

ግብረት በሐር ቀየሕ፡ ህድግ በራምጅ ዐማር ገብአ



ዲብ ፈንገላት በራምጅ ዐማር ወመትገፋት ከደማት እጅትማዕየት ህድግ።

ዐገል ዐማር ሕክሙት ኤረትሮፖ ለከሰሰ ተውድሕ ፋይሕ ሐቀ ሀብ፡ ከደማት እጅትማዕየት እት ክሉ እግል ልትመደድ ወልታመም ልትከደም ክም ህለ ለሸርሐ ሰፊር መሐመድ-ሰዒድ፡ መትገፋት ሙጅተማዕ እግል ሊዚድ እብ ደረጃት ማዕየ ዲብ ልሰርገል በራምጅ ዐማር ዶሩ እግል ለዓቤ አትፋቀደ።

እት መናሰበት፡ መስኡሊን አፍርዐት ተዐሊም፡ ዓፍየት፡ ወማሕበር ወጠን ሸባብ ወደረሰ ወራታቶም ለከሰሰ ተውድሕ፡ ወለልትርኤ ነዋቅሰ እግል ልትመም እብ ሰበትለ እግል ልትነሰእ ለቡ መባደራት ሸርሐ ሀበው።

ሓክም አቅሊም ግብረት በሐር ቀየሕ ሰፊር መሐመድ-ሰዒድ መንታይ፡ ዲብ ዮም 14 ወ15 አገልግሎት ዲብ ጠያ ወአዩማን ምዴርየት አራዕተ፡ ምስል ሸዐብ



መሻርከት እብ ጀሀቶም፡ መሐገዝ መዋሰላት ወእትሳላት ሐል እግል ልትብሳር እግሉ፡ ፍገራት ደረሰ እግል ትደቀብ ፍንጌ ዋልዴን ወመደርሲን ለህሌት ዕላቀት እግል ትተረድ፡ ወአትፋዝየት ምህነት አሰክ ብሩር

ረዩን እግል ልተላላ ለልብል ረኣይ ቀደመው።

እሊ ክእን ዲብ እንቲ፡ ሰፊር መሐመድ-ሰዒድ መንታይ፡ ዲብ ምዴርየት አራዕተ- ደገጊት ሐማርቲ፡ ኢግርሊ፡ ፈረር ወአዩማን

ለትብነ ወለሰነ መአሰሳት ተዐሊም ወዓፍየት ወመሐገዝ ማይ ሲቶ እግል ልርታዕ ዲብ አዩማን ለትዳለ መሸርዕ ማይ ሐዲሰ እንዴ ገንሐ፡ ለኢተመ ዲብ ሸፍገት ወክድ እግል ልትመም ትፋኑ።

አንፋር 39ይት ደውረት ክድመት ወጠን፡ አካዳምያይ ድሩሶም አንበተው



ናይ 12 ፊሰል ድሩሶም ወዋጅብ ወጠኖም እግል ልአትም፡ ዲብ ኩለ ወጠን ምንላ ህለየ ናይ 2ይት- ደረጃት መዳርሰ አሰክ ሳወ ለትደረው አንፋር 39 ደውረት ክድመት ወጠን፡ አካዳምያይ ድሩሶም ረሰሚ አምቡተው።

እት ዮም16 አገልግሎት ዲብለ ገብአት

ዓደት መክሰቲ ሰነት ድራሰት 2026/2027፡ ምዴር መድረሰት ካልአይት ደረጃት ዋርሳይ-ይክአሎ መምህር ርእሶም ገብረህይወት፡ ምስል ቀዋኒን ወመምሬሕ ናይለ መድረሰት ለለአትኣምር ሸሬሕ ሐቀለ ሀብ፡ ደረሰ ለሶም አብዮት ዲብ መንፈዕቶም እግል ለአውዕሎ እብ ነሻዋ እግል



ልሸቀው ተሐሰበ።

ናይ ዮም ዓመት ዐደድ ደረሰ ምን ናይለ ሐልፊት ሰነት እብ ሐድ 20 ምእታይት ክም ዜደ እንዴ ሸርሐ ህቤ፡ መድረሰት ወመርከዝ ተእሂል ክድመት ወጠን ካሬ መዳሊት ዋድያም እግሉ ክም ህለው አከደ።

ደረሰ ዲብ ሳወ ዲብለ ጸንሐ

ዲብ መደት፡ መዋመጦር ንዘም አካዳምያይ ድሩሶም፡ ወራታት ዓዳት ወርያደት፡ ጅግራታት ማዕሉማት ዓም፡ ንቃሽ፡ በርናምጅ አደቃብ አንሳት፡ ለለአትፋዘሰ ሰሚናራት፡ በራምጅ ፋግየት ወወራታት ኬወ ዲቡ ክም ሻርኩ፡ መምህር ርእሶም እብ ተውሳክ ሸርሐ።

ደረሰ ዲብለ ቀደመው ረኣይ፡

እብ ወክድ-ወክድ ለልትህየሶም መሓደራት ወነሳይሕ፡ ፈሀምም እግል ልትወቀል ወራትዐት-ገበይ እግል ልጽበሞ ዶር ውቁል ክምቡ እንዴ ሐበረ፡ ዲብ ወራታት ደረሰ ወአድረሰት እግል ልሳድፍ ለቀድር መሐገዝ ወመታክል አጊድ እንዴ ተአመረ ሐል እግል ልትባሰር እሊ አትፋቀደው።

ጋሽ-በርክ፡ እብ ቅሰም ሰያሐት ለትነዘመት መሓደረት ትትህየብ፡

ዲብ አቅሊም ጋሽ-በርክ እብ ቅሰም ሰያሐት ለትነዘመ፡ - ዲብ መንፈዕት ናይለ መጃል ወአህምየቱ ዲብ ዐቦት ሰያሐት ቀበት ዐድ ለረከዘት መሓደረት ዲብ ዮም 15 አገልግሎት እግል ደረሰ መደረሰት ሲድየት ነርሰ ባርንቶ ተህየቡ።

ዲብ ቅሰም መስኡል ፈርዕ ድራሰት ወመታብዐት አርዛቅ አሰይድ ሰምረት ገብረመድህን፡ ዲብ ሀበዩ ሸርሐ፡ ፈሀም ሙጅተማዕ ዲብ መጃል ሰያሐት ከመ ልትሐዜ ሰበት ኢትወቀሉ፡ ምን መጃል እግል ልትረከብ ለወጅቡ መሳልሕ አሰክ እሊ ክም ኢትረከበ

እንዴ ሐበረ፡ ፈሀም ሙጅተማዕ ለልትወቀል እቡ አግቡይ እግል ለሀሌ፡ ዶር ክለን ጅሃት ሕክሙት እግል ቲዚድ ወሸባብ ደረሰ ህቤ እብ ፍንቲት ዶር ሚርሓይ እግል ልቀድሞ አትፋቀደ።

ዲብ አቅሊም እብ ዕን ሰያሐት ለልትርኤ ብዙሕ ገዲም ወታኣሪክ

ደያናት ለቡ አካናት፡ መባኒ ወአሳር ክም ሀሌ፡ እብ ዋጅብ ሐቀ ትደረሰ ወተሐፍዘ ህቤ መናፍዕት እቅትሳድ ብዙሕ እግል ልትረከብ ምኑ ክም ቀድር ለሐበረ አሰይድ ሰምረት፡ እብ ቅሰም ሰያሐት መባደራት ልትነሰእ ምንመ ዐላ፡ አሰል እሊ ለትትሐዜ ፍገራት ክም ኢትረከበት

ሸርሐ።

አሰይድ ሰምረት ዲብ ደንጎቤ ለኢተሐንፊለ አርዛቅ ሰያሐት እንዴ ደረሰክ ሕፍዘት እግል ጅሃት ፍንቱ ለተርግ ወራት ሰበት ኢኮን፡ ክል መዋዋን ዶሩ እግል ለአግዴ ወዲብ ሕፍዘት ውርሰ ታኣሪክ እብ ፈዛዐት እግል ልሻርክ ትፋኑ።

ፍገሪት እምትሓን ሸሃደት 8ይ ፈሰል ረሰሚ ትሸርሐት

ዲብ እምትሓን 8ይ ፈሰል ሰነት ደራሰት 2025/2026 ምን አምተሐነው 65,876 ደረሳይ እብ ምግባይ ጌማም 60 ምእታይት ከም ሐልፈው ትሸርሐት።



እት ውዛረት ተዐሊም መስኡል ፈርዖ ጌማም ወእምትሓን ወጠን አሰይድ ግርማአለም ተኪኤ እግል ኤሪን ዲብ ሀብዩ ሐብረ፡ ለእምትሓን

ዲብ ዐድ ወዲብ ሱዳን ወሰዑድዩ ዲብ 535 መርከዝ ክም ተሀየብ እንዴ ሐብረ፡ ዲብ ከሰለ ሱዳን ለአምተሐነው ምእት ምእታይት፡ ዲብ ርዶድ ወጅደ - ሰዑድዩ ለአምተሐነው ህዩ 99 ምእታይት ክም ሐልፈው ሐብረ።

ምን ዓም ዐደድ ደረሰ ለ45 ምእታይት አዋልድ ክምተንመ አሰይድ ግረማአለም እብ ተውሳክ ሐብረ።

ለአምተሐነው እብ ሐምስ ጅንሱምህሮ በህለት እንግሊዝ፡ ሕሳብ፡ ምህሮ እጅትማዕየት፡ ምህሮ ጅንሰየት ወዕሉም ተሀየቡ።

አሰይድ ግርማአለም እት ደንጎብ ከደማት ረውዳት እግል ልፍየሕ ወልትደቀብ እንቡት ለህለ በራምጅ ዲብ መጽእ ወክድ እግል ዝያድ ፍገሪት ለሰዴ ሰበት ቱ፡ እብ ትደቀበት ገበይ እግል ልትከደም እቱ ትፋ።

ፍገሪት ናይለ ምን ዮም 3 ኣክስ 5 ጁን 2026 ለገብእ እምትሓን ጀንራል ዲብ መዳርስ ንድእት ሰበት ህሌት፡ ደረሰ ዲብ መዳርሶም እንዴ ጌሰው ነታይጅም እግል ለአምሮ፡ ፈሬዕ ጌማም ወእምትሓን ወጠን ለአትፋቅድ።

ሰዳይት እግል ዓይላት ሹሀደእ ትትሀየብ

እት አቅሊም ጋሹብርክ - ምዴርያት ጎኚ ወሻምብቅ፡ እብ ሸቃለ ሕኩመት ወሰብ-አርዛቅ እግል ሕጉዛም እብ ዓመት፡ ዐዓይላት ሹሀደ ህዩ እብ ፍንቱይ ለትጉብእ ሰዳይት፡ እብ ገበይ-ንዝም ተአተላሌ ክም ህሌት ተሐበረ።

ዲብ እዳረት ምዴርያት ጎኚ መስኡል ውሕደት ከደማት እጅትማዕየት አሰይድ ሳሌሕ ተልኪ፡ እብ ሸቃለ ሕኩመት ወሰብ መአሰሳት ተጃረት ወብዳም ሰብ-ብሕቶት ትትነሳእ ለህሌት መባደረት እብለ ከሰስ ዲብለ ሀብዩ ሐብረ፡ እብ ደረጃት ምዴርያት ምን ሰነት 2021 እንዴ አምበተ እብ ገበይ ንዝም እግል እት ሰዳይት ዓይላት ሹሀደ ወብዳም ሕጉዛም መባደረት ትትነሳእ ክም ጸንሐት እንዴ ሸርሐ፡ ዲብ ሐልፈ አውርሐት ለትፋገረ 79 አልፍ ናቅፈ እግል 32 ዓይለት ሹሀደ ክም ትካፈለ አብርሀ።

እቱ ሐልፈ ሐምስ ሰነት ሌጠ ዝያድ 170 አልፍ ነቅፈ ምን ሸቃለ ሕኩመት፡ ሰብ-መአሰሳት ወሰብ ውዳይ-ሰን እንዴ ትጀምዐ እት ዝያድ 300 ዓይለት ክም ትካፈለ ለሐብረ አሰይድ ሳሌሕ፡ ዓይላት ሹሀደ እብ ማል ወመምተልካት ሰዴ መስኡልየት ወጠንየት ሰበት ገብአት፡ እብ ገበይ ንዝም ክም ለአተላሌ አከደ።

እሊ እብ ሹብህ፡ ዲብ ምዴርያት ሻምብቅ ለህለው ሸቃለ ሕኩመት፡ ምን ናይ ወሬሕ መሀየቶም ለአትፋገረዉ 115 አልፍ ናቅፈ



እግል 23 ሕጉዛት ዓይላት ሹሀደ ክም ትካፈለ፡ መስኡል ውሕደት ከደማት እጅትማዕየት አሰይድ ሃይሌ ተሾሚ ሐብረ።

መስኡል መክተብ ዐመል ወመንገፎ እጅትማዕየት ዲብለ ምዴርያት አሰይድ ዐንዴመስቀል ዝሄኢ እብ ጀሀቱ፡ ለእብ ሸቃለ ሕኩመት ለትነሳእት መባደረት፡ አተላላይ ናይለ እብ ገበይ ንዝም ለገብእ በርናምጅ ሰድየት ገብእ እት ህለ፡ ዲብ መናበረት ናይለ ዓይላት ፍገሪት ሰኔት ክም ህለ እግሉ አፍሀመ።

እብ ብዕድ እንክር፡ ዲብ ለትፈናተ ድወል ለነብሮ መዋጥኒ፡ እግል ረዘቀት ሰንዱቅ እማነት ሹሀደ ወራዐየት ዓይላት ሹሀደ ተበሩዓት ክም ወደው፡ ውዛረት ዐመል ወመንገፎ እጅትማዕየት ሐብረት።

እብ አሳስ እሊ፡ ኤርትራዊን ሰነን ኤድመንተን ወድዋረ - ካናዳ

127,606 ነቅፈ፡ ምን ሉጋን መዲነት ዩተ 3,440 ዶላር፡ ሰነን ኮፕንጎን - ዴንማርክ 75,579 ነቅፈ፡ ክምሰልሁመ ሰነን መዲነት ኡረብሩ - ሰዊድን 36,486 ነቅፈ እግል ረዘቀት ሰንዱቅ እማነት ሹሀደ ትበርዐው።

እምበል እሊ፡ እብ መሓብር “ሕልናዊ መሽተ” ወራታቶም ለወዱ ኤረትሮፎን ሰነን ጀርመን 5,040 ዩሮ፡ ዲብ ለትፈናተዩ ድወል አርብ ለነብሮ አንፋር መትሰዳዳይ ኮር 491፡ 3,300 ዶላር፡ አንፋር መሕበር መትሰዳዳይ ግብለት ሰዊድን 2,100 ዩሮ፡ ጃልየት ኤረትሮፎን ዲብ ዩቪክ ወድዋረ - ኖርወይ 32,211 ነቅፈ፡ ኤረትሮፎን ሰነን መዲነት አቪክ -ሰዊድን ህዩ 26,300 ክሮነር፡ ወዲብ አንጎለ ለነብር መዋጥን ህዩ 7,800 ነቅፈ እግል ራዐየት ዓይለት ሹሀደ ትበርዐው።

ከረን፡ ዐደድ መዳርስ ዐቦት ለርኤ

ከረን፡ ዐደድ መዳርስ ዐቦት ለርኤ

ዲብ ምዴርያት ከረን፡ እብ መዓወነት ሸዑብ ወሕኩመት እብለ ገብእ ጅሀድ ትፋድ፡ ዐደድ መዳርስ እብ 16 ምእታይት ክም ዐቡ እት ዮም 14 ኣጎሰት ዲብለ ገብእ ጌማም ሰነት አካዳምየት 2025/2026 ተሐበረ። ዲብለ ገብእ ጌማም፡ ምስል

ሰነት ድራሰት 2024/2025 እብ አትመጣዋር፡ ዐደድ መአሰሳት ተዕሊም ምን 68 ዲብ 79 ክም ትወቀለ በርሀ።

መስኡል መአሰሳት ተዕሊም መምርህር ዮሴፍ ዑቅባስላሴ ዲብ ቀደመየ ከሊመት፡ አግደ ሀደፍ

መዳርስ ለሌሰ ጂል እግል ብንየት ወረበየት ክምቱ እንዴ ሐብረ፡ እሊ እግል ልትአከድ፡ መደርሲን ወክሎም ጀሃት ተዕሊም እብ አሳስ ዐገል ወመምሬሕ ሀደፍም እብ ብቅዴ እግል ለአትምም አሳስ ክምቱ አፍሀመ።

ዲብ ሐልፈት ሰነት ለትሰጀለ መትቀዳም እንዴ ተሐፈዘ፡ ክምሰልሁመ ለትርእ መሓግዝ እንዴ ተአመረ ሐል እንዴ ገብእ እግሉ እግል ትወቀለት ፍገሪት ከዴም፡ አግደ ሀደፍ ናይለ ጌማም ክምቱ ህዩ ሐብረ።

መስኡል ፈሬዕ ተዕሊም

አቅሊም ዐንሰበ መምህር ክፍላይ ዐንዴሚካኤል እብ ጀሀቱ፡ ዲብለ ምዴርያት ትትሰጀል ለህሌት ፍገሪት ሐቀለ ሐመድ፡ ብቅዴ ምህሮ ምንለ ለህለ ዲቡ ወለዐል እግል ልትሓየሱ፡ አርዛቅ መቅደረት አዳም፡ ማል፡ አላት ወወቅት እብ ዋጅብ ዲብ መንፈዐት እግል ልውዐል ትፋት።

ዲብ ደንጎቡ ወኪለት ምዴር ምዴርያት ከረን አሰይደ ለቴንጉስ አብርሀ፡ ወራታት አትሐያስ በቃዐት ምህሮ ዲብ መሸንገል መደርሲን ወመድረሰት ሌጠ ለልትከሬ ወራት ሰበት ኢኮን፡ ዶር መጅተማዕ ወጀሃት



ብዕድ እግል ልተረድ እት ተአተንብህ፡ እዳረት አቅሊም ለተአትሐዜ ሰዳይት ክም ትወዴ አከደት።



ጸሐፊዎች

ክል አርቡዕ ለትጠ'በዕ ጀሪደት

መዳልያይ፡-

- መሐመድ እድሪስ

ለይአውት

* ፋዋን አድም

አርተዖት

* ዘህረ ዐሊ

ተለፎን፡ 121797/201820 (258)

ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡163471-07588045

አትአመሮት፡

ተለፎን፡ 125013፡ ዕ.ሰ.ቡ፡ 1284

(5^ይ ወናይ ደንበ ስፋል)

እት አምዲላት ሕርየት እት ሕንብራለ መዲነት ተመምኑ። እት ዕሰረ ጁን ተእሪካይት ዕለት ዝክረት ሐበን ህዩ። አክል አሕድ ደብር-መጠረ ግራን እንዴ አትሌናሁ ከእግለ ታኪ ደብር-ሳይም ተዐርፊ። ሄራረ ገበይ አስክለ መቅበረተ ፍራሰ ሓየት ጋንሐት እት እንተ ክምሰል አሰሀለት ጽግብት። ረአሰ ቀደም አስክ ሐምቦካ እት ትትመደድ ትርኢት። ለምሴተ ሄራረ ሽምዐት ገቢል ወጃሽ ምነ መዐስከርነ ለሀለ እተ አካን ደዐርተት ተበገሰኑ። አስክ መቅበረት ሹህደ። እት ለአሴርር ፍሬ ወለዘት ሕርየት። ወለ ቃሊ እስትሸሃድ እት ጣፈሐት ጽርግዩ ሰኒ ለአትለውቁ ዐለ።

“አሰናይነ ሕናመ! እለ ምንዲ ርኤነ። መትዋዳቅ እኮን ወመትህራጋፍ። ሄራር ሌግ ነሐርከ እንዴ መልክ” ልብሎ እት እንሰምዖም ሰካንለ መዲነት ወለ ሽብሃተ። እማት ወአበወ. ሰኒ ተረየሐነ። ላመ እግል ዝክረቶም ወፊቃደሆም ሴር ጸብጣም ለአምሴነ ሹህዳነ። እብ ፈድል እስትሸሃዶም። ምን ክል ክርበት ወጭዊት ክምሰል ተባልሐነ ክል ዎርትካ እብ ደሚሩ ደግሞ እግሎም አምሴ። መዐነት ወተርጀመት ሰላም ወእስትቅራር። ሚ ክምሰልተ ህዩ አመረ። እንዴ ኢልትዐናቀፍ ወኢልትጸደፍ ለእግለ ቃሰዳም ለዐለው መቅበረት ሽውህደ እተ ክማም ገብአው።

ሕናመ ሽቃለ መሰሰት አሰቤኮ እትሊ ወክድ እሊ ዎርትካ እብ ወቀዩ ላልትሐበን እቲ ወሽንን ወክድ ሰበት ህሉ። ሰኒ እብ ደሚሩ ተረይሐ ወፊገ። ለእግሉ እግል ትሸቄ ወጅቡከ ዋጅብከ እት እንቱ አክለ እት መሰለሐት ገቢል ሕርባይ አውቁክ ዝያደት ለጠዐመ ሕርየት ወለ መዐነተ እስትሸሃድ ተአትዋይነ ወትትበይን እግልከ።

መዲነት ሰንዐፊ መዲነት ታሪካይት አሳር ተ። አሳር በለው-ክለው እምበ-መጠረ ከሱከሴ ቆሐይተ ምሰል አሳር ናይ ዮም እግል መዲፊዐት ወሕርየት ለደፊዐ እተ ቃሊ እስትሸሃድ። ዐጃይቦታት ለትመልክ መዲነት ተ።

እግል ኖሱ ለጠቢዲያይ መካሪተ መዲነት ላለአትፈክር ቲ። ለትወቀለ ርሽመት ደብር (እምበ ሴረ) እት ዐድነ ኤረትርየ እትለ ምዴርየት ምንዲመ ለህሉ። እተ መዲነት እት እንተ ኢልትርኤ እከ። (እምበ) ለትብል ሰሜት እትለ ምዴርየት ሰኒ ብዝሕዋ ተ። እምበ ታሪክ። እምበ መጠረ- እምበ-ሳይም። እምበ ሐሰሉ። እምበ ኮከት። እብ ዐቢሁ ህዩ እምበ ሴረ እግል ልትሰሜ ቀድር።

ከረ እምበ መጠረ እት ወቅት ላሊ ምን ቀበት ቤት ፍግር እንዴ ትቤ አቅመትካሆም ምንዲ ገብእ። ዐስተር ደብነ ሰኒ ክብድት ካርየት ለህሉት ተመሰል እትከ።

ለርሸመተ አድብር ለእግል እለ

ሰንዐፊ! ፈቀዲቶ ማሌ ወዐማር ዮም



መዲነት ክሉል ስብሓን አላህ ለመካሪቱ ወለክልቀቱ ሰኒ ፍኑቱይ ቲ። ብለቅ ሰኒ ውቁል እት ገብእ ገሌሁ እት አሕድ ክሊት ባልሰ ለሀለ እት መሰል። ሰሩ ህዩ። ረዩም አሕድ ቅሩብ አሕድ እት እንቱ መፋግሩ ግሙጩይ ወቃሲ ቲ። አብዓት መፋግሩ ኢርቶዕ እግሉ ተአቀምት እቲ።

ለዐደታት እግል ኖሱ ምን ረዩም እግል ልትርኤ እከ ኢልትቀደር። እብ ክሊት ናይ ቀላሚጦሰ ለትገልበባ ቲ። ክምሰልሁመ ለመናበረቲ። ምን ካልእ ሰካን ልትትፈንጉ ቲ። እብ ብዝሐ ንህብ ወደወርህ ተዉቡ። ለደውርህ ሐቲ ዲርሆ አክል ደረን ሰኒ ልሕም ነዊድ ትገብእ። ለጃክ ህዩ እብ ግንሐቱ ክልኤ ዕንክ ለአጸግብ።

ሐቲ ዓይለት እግል መሓግዝ መናበረተ ለአረቲዕ ቀፎታት ንህብ ትመልክ። እሊ ህዩ እት አርትዖት ዕለታይ መሓግዝም ዓይለት ልግበእ ወለ እግል መቃዲት ሱጎም ምህመቱ ዐባይ ቲ። ፍሬ መዐር እት ዕለታይ ነብራህ ዓይለት ምንዲመ ኢፈግር። መዐር ለቀለ ፍረይለ ዓይለት ለትመልኩ እግል ልትበሀል ሽእ ቀሊል ቲ። ፍሬ መዐር እተ መዲነት ወለደዋሒህ ቅዙር ቲ። አምዕል ሰንበት ንእሽ ዐዳገ በጽሐክ ምንዲ ገብእ አንቀዋቅሐት (ቤጭ)። ወመዐር እብ ብዝሐ አስክለ ዐዳገ እት ልትጎረት ትርእዩ። ለብዝሐየ ዐዳገ ለልትከረየ አዋልድ አንሳት እት ገብእ ውላድመ ተብዕን ሰናዱቅ እንቅቅሐ ወቆፎታት ደወርህ እንዴ ጸዐነው ላለአቱ ሕዳም ኢኮን። እሊ ናዮም ለመድ እት ካልእ ደዋዩሕ እግል ልትለመድ ነፍሰክ ኢተአብዩ እግልከ። ሰበቡ ምህመት ወደር መዐር። ወፍገሪት ደወርህ እት እቅትሳድ ሐቲ ዓይለት ቀሊል ክምሰል ኢኮን። ምን ደሚር ምን ገብእ በዴ።

ሰንዐፊ መዲነት ሕዱድየት ምን ገብእት ምነ ወአስክ ብዙሕ በዳዩዕ እት ልትነጃል ትርእዩ። እብ ዱቅሪ ልግበእ ወእብ ወለት ገበይ ሓልቦታት መትርበት ለአውሀሌ እተ። ገሌ እብ ነሐሩ ጎርት ወገሌመ እብ ዐጃላት ልትሳሰዩ። ኬን ውወእንሰር ትሉሉይ ሐረከት ትርኤ። ገሌ ገይሰ ወሰርመ እት ለአቀብል ትርእዩ። እሊ ሰድ እሊ “እተ ህለው ለሀሉ ሰካን ሕዱድ

ለሐሰው ቶም” ላልብል ፍክር እት ደሚርከ ለተውርድ እግልከ። “ኤእ! ኢደሌከ ወኢሰምዐኩ ሰካን ሕዱድ ክል ዶል ሐያቶም ፍንጌ ኮፍ ወፈረጀ ሕኒት ተ” ላልብል በሊሰመ እተ ዶሉ ደሚርከ በልሱ እከ።

እግል እሊ ትብለሰ እት ክሉ መናዋቅ ሕዱድ እትለ እተ እነብር እዲነ እብ ፍክርከ ትጠውፍ። ለአማን ህተ ክምሰልተ ኢትበዴ ምንከ። እሊ ሰድ እሊ እንታመ “ያረቢ ሰላም ወአማን ምደድ እግል ክሉ። ወእግል ሰካን ሕዱድ ሰልፍ ክሉ” እት ትብል እብ ደሚርከ ወበሊሰ አፋከ ተአተድዔ። ሐትነት ምስሎም ትበዝሕ ሞላዶም እት ክልኤ ካሸት ልትረከብ። ፈርሀትመ እቶም ዘይድ ሰላም ክልኦት ገቢል ወሰልኦሰ ሰልፍ

ኬረ ህቶም ካፋሉ ወሸራመ እብ መትሸዕታርም ለአሰተብዴ። ርክሰ ላቱ ብዙሕ ኢኮን። እት ዝራዐት ወርዕዮ ንዋይመ ክምሰል ክል መዋዋን ኤርትራ ዶሮም ቀሊል ኢኮን።

እት መዲነት ሰንዐፊ ለነብረ ክልኤ ቆሚያት ተን ለእሙራት። ሳሆ ወትግርኛ። ክልኤ ልቀት ልትሃገዩ ሳሆ ወትግርኛ። እብ ሕሸመት ወፍቲ አሕድ። እት ክሉ መናሰባተ ክልኤ ቆምየት ክምሰል በርሀት አደሐ ጸዐደ በይን እግልከ። አንሰ ወተብዐት ዕምር ክእበ ዕምሩ አሕድ ሻርክ። ፍንቲት ልቀት ኢኮን ወደያነት። ዎርት ምን ሰካን እለ መዲነት እግል ልግበእ ለኢልሐዜ ይህሉ። ኢርብ እብ ልቀት እት ልቀት ሳሆ ለልትሃገው። ወእብ ደያነት እብ ዲን ክሰታን ላለአምኖ መዋዋኒን ቶም። እለን ክልኤ ቆምየት ክል ምነን ክለ ናይ ካልእ ቆሚያት ህግዩ መልኩ። ወልትሃገዩ። እብ ለብሳቶም ኢፈናቴካሆም ምንዲ ኢገብእ። ህግያሆም ላቱ ኢልትፈናተው እከ። እት አድሕድ ለወልደው ወተልደው ምን ገብአው ህዩ ክሉ ገቢልነ ሐብር ምንዲመ ገብእ ህቶም ላቱ ዝያደት ብእቶም።

እብ ፍንቱይ እትሊ ሽብሃት እሊ እት ወቅት ሰድት ወዘማቴ ወወራር

ደረሰ ዐማር ከረም ወወቀዮም

189 ደረሳይ። ዲብ ሕፍዘት ማይ ወትርበት ወቀይ ሰርጉል ክም ወደው እንዴ ሸርሐ። ለትሸቀ አክረት ወአሸርዐት ለቀዋረት ዝላም ማዩ እግል ልትሐፈዝ ዶር ምህም ክምቡ አብረሀው።

እምበል እሊ። መጥ-መጦር በራምጅ ዐማር። ፈዛዐት ደረሰ ለወቅል። እት ዳፍዖት ጀራይም ወአብሳር ሐርሰ ለረከዘ መሐደራት ክም ትነዝመ። እብ ተውሳክ አፍሀመ።

አፍዐበት። እት ምዴርየት አፍዐበትመ 550 ደረሳይ ለሻረከው እተ ምን ዮም 6 ጁላይ አሰክ 15 አገሰት ለአተላለ ሸቅል ዲብ ሕፍዘት ማይ ወትርበት ወሸትል ለረከዘት ፊራሮ ክም ትሰርገለት። ሙዲር መድረሰት ካልኣይት ደረጀት አፍዐበት እስታዝ እድረሰ ዑመር እት ዓደት መትመሞ ሸቅሎም ሐበረ።

ወኪል በዐል ሰልጠት ዕጩይ ወሔዋናት ከደን ዲበ ምዴርየት ሻብ ጀማል እድረሰ እብ ጀሀቲ። 6 ኪሎምትር አክረት ክም ትሸቀ ወ 18 ኪሎምትር ከም ሰነ እተ ክምሰልሁመ ሐድ 10 አልፍ ሕፍረት ሸትል ክም ትዳለዩ ወ4 አልፍ ዕጩት ከም ትሸተለዩ ሸርሐ።

ሙዲር ምዴርየት አፍዐበት አሰይድ አሕመድ መሐመድ -ኖር

ለርኢቱ ወአዜ በክት እንዴ ረክቡ ክእት ዐማር ሹሩክ ገብአከ ምንዲ ገብእ። እብ ደሚርከ ሰኒ ተስተንትን ወትትፈከር። እብ መካሪት ምድር ልግበእ ወጠቢዐት ጂኦግራዊት። ወቅል ለቴካህ ሀዉ ለቤለ ሐሰዮት። ወአቅረት እግል ጋድሞታት ሱጡር። ምሽብሻብ ምሕላፍ ለአለቡ በለሰ ወሸዋክ ዓጩይ። እግል ትፍገሩ ወትትከረዩ ለኢልትቀደር አሳት ወመዳንን። አግቡዩ ግሙጩይ እረድ ወግዳማት እት ነጌብ ከደን።

ክምሰልሁመ አርድ አሳር ክምሰል ዐለ ለእተ ወክድ ለሀይ እብ ሚ ክምሰል ጸረበ ወትናቀሽ ወተረፈዐ ለኢትአመር እበን ሰኒ ረያይም ወድቁብ እበ ለተአትዐጅብ ገበይ ለትጸረበ ትርኤ እቲ። አይወ! ለጠብዲያይት ክልቀት እግል ኖሰ ምስትንክርተ። እት ረአሰ አሰ ዎርት ምፍጋር ለዐል ለአለቡ ወምክራይ ተሐት ከኒሰት ብኒት እቲ ክምሰል ርኤካህ። “እትሌሀ አካን ሌሀ እብ ከአፎ ፈግረው? ወእበዩ እበን ወክሉ መዋድ ብነ ዓረገው? ሚ ለትመሰል ዐጃይብ እንርኤ ወእንሰሚዕ ህሌነ” እት ትብል እግለ እብ አድጋማት ገሌሁ እት ሰሚዕ ክምሰል ከረ (ሃም) ቀደም ሰኒን ወድኒን ለሞተው አንፋር። ገናይዞም ክምሰለ ወቅተ ሞቶም ለዐለ እተ ሓለት ጠቢዲያይት ናይ ክል መክሉቅ ወቅት ሞቱ እት መስሎ ክምሰል ርኤካህ ትትፈከር።

ረጀብ እብ ጀሀቲ። ለደረሰ እት ሸቅሎም ለአርአው ሕሰር እንዴ ሐመድ። ዲብ ድራሰቶም እግል ልፈደቦ አትፋቀደ።

እተ ፊራሮ ደረሰ ለለወቅ በራምጅ ወለትፈናተ አትፋዘዕ እብ ፖሊሴ ጀብሀት ሽዑብየት እግል ዲሙቅራጥየት ወዐዳለት። ሐርሰ ወዓፍየት ከም ገብእ ወኪል ኤሪነ ሐበረ።

ምግብ። እት አቅሊም ምግብ። ደማነት ደሐን ተራፊክ እግል ትትአከድ ፍሩራም ለጸንሐው ደረሰ ዐማር ከረም ወቀይ-ሰርጉል ክም ወደው። ዮም15 አገሰት ዲብለ ገብአት ዐደት ካቲመ ትሸርሐ።

መስኡል መሕበር ደሐን ተራፊክ ጽርግዩ ኤረትርየ አሰይድ እስቲፋኖሰ ሀብተማርያም ዲበ አስመዐዩ ከሊመት። መሕበር ምስል ፖሊሰ ተራፊክ እንዴ ተዓወኑ። ፈዛዐት መጅተማዕ እግል ትትወቀል ዲብለ ወደዮ ወራት ፍገራቱ ለልትሐመድ ክምቱ እንዴ ሐበረ። ለደረሰ ለወደዉ ወቀይ ሐመደ።

መመቅርሐትለ በርናምጅ እብ ጀሀቶም። ዲረሰ ዲብ አግደ ሸዋሬዕ ናይ መዲነት አስመረ እንዴ ትፈረረው። ለተህየቡም ሸቅል እብ መዕጸም ክም አትመመዉ ሸህደው።

ክሰሐ ማይ እብ ክቡድ ሐጻይን

ናይ ዮም መውዳዕነ እብ ክሰሐ ተለውሰ ማይ እብ ክቡድ ሐጻይን (Heavy Metals) እብ ለልብል ኦርጅኒ እብ ሙሉጊት ማህደረ ምን ውዛረት ርዝቅ በሐር ለዓለ፡ ዲብ ጀራደት ሐዳስ ኤርትራ ፋግር ለዐለ፡ እግል ቁርኣት ነፍሶ ሰበት እንቤ እንዴ ተርጀመን እንቀድሙ እግልኩም ህሌን። ቅራኣት በኪተት።

ማይ እብ ኣክሰጅን ወሃይድሮጅን ሓብር ለትኣሰሰ ሰኒ ኣሳሲ ጽበጥ ለቡ ኣራውሕ እብ ዓፍየት እግል ልንበር ለለትሐዜ ምህም ከይራት ቲ። ኣራውሕ ዓማት ማይ ምን ከዛናት፡ መራታት፡ ውሓይዝ ወወሊ ክምሰልሁም ምን ኣብሐር ወምሒጣት ረክቡ።

ማይ ለትፈናተ ኬሚካሊያት ጠቢዐት ናይ ፈናተዮት ሃይድሮጅን ቦንድ ሰበት መልክ ምስል ለትፈናተ ማዳት እንዴ ተሓበረ እግል ማዳት ናይ ሓቀቅት፡ መጠጥ ወናይ ሰቤ በህለት ምን ለዐል ክም ልትሐረክ ናይ ወዴ ጠቢዐት መልክ። እብ ሰብብ እሊ ለህለ እግሉ ፍንቲይ ጠባይዕ እብ ለትፈናተ ኣሰባብ ለረክቦም ዴረት ማዳት እብ መትሓባር ዲብ ለትሐደደ ወክድ ዲብ ዴራይ ሸይ ልትብደል። ሰበት እሊ ሰብ መቅደረት ተለውሰ ማይ



እግል እሊ እብ ሰብብ ተለውሰ ለወዴ ማዳት ልትወቀል ለህለ ናይ ድዋር ደማር እብ ዐቢ እህትማም እግል ልግንሕወ ጅቡራም ክም ህለው ልትኣመር።

ሰብ መቅደረት ተለውሰ ማይ ክምመ ለሸርሕወ እብ ደረጃት እዲነ ብዙሕ ናይ ተለውሰ ማዳት እብ ትሉሉይ ዲብ ድዋራት ማይ ልትገሐፍ ክም ህለ ለሐዝር። ሰብብ ናይ እሊ ተለውሰ ለለኣመጽእ ኣሸያእ ብዙሕ ምንማቲ፡ ገሌ እግል ሰምየት ምን ልጠወር ለህለ ነሻጣት መሳንዕ፡ ተጠውር ተክኖሎጂ፡ ወሰኑት ብዝሐ ሸብቤ ኢራትዕ መትነፍያት ኣርዛቅ፡ ናይ ሐርስ ወዓኢላት ነሻጣት እግል ልትብህል ልትቀደር።

ዕመማይ ተለውሰ ለወዴ ኣሸያእ ብዝሐም ምንማቲ፡ ለዝያድ እህትማም ለልትህየም ዲብ ዓፍየት ወድ ሚን ኣደም እኪት መደረት ለሰብብ ላኪን ሐጻይን ክቡድ። “እሊ ሐጻይን ክቡድ” ለልትብህል ጅንስ ብዝሐሁ ምን 5g/cm3 ወለዐል ለበጽሕ እብ ሐድ ቅያስ ምንመ ገብእ ለትወቀለት መደረት እግል ልሰብብ ለቀድር እትገብእ ክም ከረ ኣርሰኒክ፡ ሚርኩራ፡ ሊድ፡

ክሮምዮም፡ ካድምዮም፡ ኒክል፡ ዚንክ፡ ነሐስ፡ ፍደት፡ ታይም ውበዕድ ሸምል።

ኣክላቅ ሐጻይን ክቡድ፡
ሐጻይን ክቡድ ዲብ ገርብ ኣራውሕ ናይ መትኣካብ ጠቢዐት (Bio-accumulation) መልክ። እሊ ባህለት ኣራውሕ ዲብ ሄራር ሐያቶም እብ ለትፈናተ ኣሰባብ ለሳድፎም ናይ ተለውሰ ኣሸያእ እብ ፍንቲይ ሐጻይን ክቡድ ወድድ ባልዲን ዲብ ገርብ ክም ኣተ ሕኔት ለሐቅቅ እብ ትሉሉይ ደፋእ እብ ደፋእ ልትኣክብ። ሰበት እሊ እብሊ ኣግቡይ እሊ ዲብ ገርብ ዓሰታት ለትኣክብ ተለውሰ ለወዴ ኣሸያእ ውላድ ኣዳም ዶል በልዕወ ለትኣክብ ሐጻይን ክቡድ ዲብ ገርብ ውላድ ኣዳም ልትዐዴ።

ለኣክ ቅያስ መትኣካብ ተለውሰ ለሰብብ ኣሸያእ ዲብ ኣራውሕ ምስል

ወሰኑት ደረጃት ስልሰለት ነብረ (food chain) ቅያስ መትኣካብ ተለውሰ ለወዴ ኣሸያእ እት ዘይድ ለገይሰ እብ ግብኣቲ። ምን ዲብ ስልሰለት ናይ ነብረ ለህለው ኣራውሕ ለሐደ ናይ ተለውሰ ኣሸያእ ዲብ ገርቦም ልትኣክብ። ለገብእ እብ ሰብብ ህዩ ለዲብ ለትወቀለት ስልሰለት ነብረ ለንትነፋዕ እብም ኣራውሕ እግል ዲብ ሐንቲህም ለህለው ክም በልዐው እብ ሰብብ እሊ ቅያስ ናይ ተለውሰ ለልኣመጽእ ኣሸያእ ዲብ ገርቦም ልትኣክብ። እሊ ህዩ ዘህረት ናይ ሐጻይን ክቡድ ልትብህል። ናይ ማይ ክልቀታት እብሎም ናይ ሐጻይን ክቡድ ማዳት ዲብ ለልትክበቦ እቲ ወክድ፡ ዲብ ገርቦም እግል ልሳድፍ ለቀድር ናይ መትሰማም መደረት እግል ቲዚድ ትቀድር። ምስሉመ ወሰኑት ሐፋነት፡ ድሀር ቅያስ ኣክሲጅን፡ ውቁል ቅያስ መትሐምራግ፡ ውቁል ቅያስ ሐመር ኣው PH ውበዕድ እግል ልትሰሚ ትቀድር።

ሐጻይን ክቡድ እት ዓፍየት ለህለ እግሉ ተኣሲር፡
ሐጻይን ክቡድ ናይ ኢመሽመሽት፡ ወኢሐቂቅ ኣክላቅ ሰበት ቡ ውቁል

ሰም ወመትኣካብ ዲብ ስልሰለት ነብረ ውበዕድ ዴራይ ኣክላቅ ሰበት ቡ፡ ዓፍየት ውላድ ኣዳም እብሊ ሰም እሊ ልትደረር። እብ ተውሳክ ዲብ ገርብ ኣራውሕ ለትኣክብ ተለውሰ ለወዴ ኣሸያእ እብ ትሉሉይ እግል ልትቀቅ ኣው እግል ልትወርኬ ሰበት ኢቀድር። ዲብ ልትሐደደ ወክድ ክቡድ ናይ ዓፍየት መደረት ኣሰክ ሞት እግል ልሰብብ ቀድር።

ኣግደ እብሊ ሐጻይን ክቡድ ለልደም ከፈፍል ገርብ፡ ልብ፡ ከላዊ፡ ከብደት፡ ሸብእ፡ ዓጭሞታት ወኢምዓይት እግል ንሰሚ እንቀድር። ክም መደረት ህዩ ዳይም ወቂትላይ ሕማም ሰረጣን፡ ብሮንካይት፡ ከላዊ፡ ከብደት፡ ድዕፍነ ዐቅል ወኢሰራር ለኣበጽሕ። እሊ ልግባእመ እንዲኢትን ተለውሰ ድዋር እብሊ ለተሊ ኣሸያእ እግል ተኣድሕን ልትቀደር። ለሰበቡ ለበዝሐ ዲብ ናይ ኣምዕላይ ሐያትነ ለንትነፋዕ እብ ለትፈናተ መሻቀይታት ምን እሊ ለትሰመ ሐጻይን ክቡድ ለትሸቀ ሰበትቲ እሊ ለሐሰ ሐል ለንቅስ እብ ኣግቡይ እግል ነትኣታቲ ግማመት ቀደም ግሕፈትነ ህዩ ኣዳለየት ወራቀቦት ተለውሰ ወመሰማም ጋራት ክም ነቅስ እግል ኒዴ ሰበት ልትቀደር።


ዴማት ተለውሰ ማይ እብ ሐጻይን ክቡድ፡
ተለውሰ ማይ እብ ሐጻይን ክቡድ ምን ጠቢዕይ ወኢም ለሸቀዩ ኣሰባብ ለመጽእ እብ ጠቢዒታይ ምን ነድ ቀባት፡ ኣልቃም፡ ቦልካን፡ ምትሳባር ብለቅ፡ ውበዕድ ልትብገስ። እብ ውላድ ኣዳም ለመጽእ ህዩ ዲብ ለዐቢ ገይሰ ለህለ ለኣግደ እንዴ ኢትጫሬ ልትክዔ ለህለ ናይ መዲነት ወመሳንዕ ግማመቲ። ውቁል ቅያስ ኢራትዕ መትነፍያት ኬሚካሊያት ሐርስ ወደወ፡ ምን ተዕዲን ወዴማት ጣቃት ለልትክዔ ፊሻይ፡ ኤለትሪክያይ ግማመት እግል ንሰሚ እንቀድር። ዕመማይ ሐጻይን ክቡድ ዲብ ናይ ኣምዕላይ ለንትነፋዕ እብም ኣላት እብ ሸክል ሐብር ሃይድሮኦክሳይድ፡ ሳልፊሪክ-ኦክሳይድ ወሲሊክይት ልትረከብ እቲ።

1. ናይ መሳንዕ ርስሐት፡ እንዴ ኢትጫሬ ለልትገላፍ ናይ መሳንዕ ርስሐት ለኣግደ ሰብብ ተለውሰ ናይ ምንለዐል ወሐን ኣርድ ለልትረከብ ማይቲ። እሊ ግማመት እሊ ርስሐት ዲብ ቀበተ ለልትረከብ ብዙሕ መደረት ለለኣመጽእ እግል ወድሐት፡

2. **ተዕዲን፡** ዲብ ኣሸቃል ተዕዲን ደመሮት ወተቅይር ሸክል ኣርድ ሳድፍ። ክምሰልሁም እብ ብዝሐ ርሶሕ ማይ ምን ኣሸቃል ኣትጫረዮት ተዕዲን ወመትባረዲ ልውሕዝ። እሊ ለልውሕዝ ፊሻይ ርሶሕ ዋጅብ ኣትናደፎት ኢገብእ እግሉ ምንገብእ ዝላም ክም ዘልመት እንዴ ተሐጸበ እብ ሸክል ውሒዝ ዲብ ናይ ማይ ጅዙእ እንዴ ተሓበረ ተለውሰ ክቡድ ሰብብ።

3. **ኤለክትሪክያይ ግማመት፡** እብ ኣሳስ እድንያይ ተቅይም ናይ ኤለክትሪክያይ መምተለነት እብ ፍንቲይ ተለፎናት ሞባይ እብ ብዙሕ ኣርቃም ወሰክ ክም ህለ ልትሸራሕ። እሊ እት ወግም ለኣተ ህዩ መፍርየት መኣሰሳት እግቡይ መትነፍያት ለከርበ ወለ ኣበረ ዓፍሽ ለከሰሰ ክቲብ መምርሕ እግል ለኣዳለየ ናይ ቃትን እልዛም ጀብረን። ምናተ መትነፍያይ እሊ ቃትን እሊ እንዴ ኢልትነፋዕ እት ክል ኣካን ክም ለክፍ ልትሸራሕ። ናይ እሊ መደረት ህዩ ምን ተለውሰ ለሳደፊዩ ባክት ለልትነፋዕ መጅተማንት መደረት ዳይም ሕማማት ቀርቡት፡ ኣተንፊሶት፡ ሐቀቅት ነብረ ክምሰልሁም ሰረጣን ለመሰል መደረት ሳድፍ ክም ህሌት ልትሐበር።

4. **ነሻጣት ሐርሱ፡** ክም ልትኣመር ብዝሐ ሸብብ እዲን ምን ወክድ ዲብ



እብ ዕንታት ለኢልትርኤ ሐጻይን ክቡድ፡ መኣዛታት፡ ፋርማሲያይ ርስሐት እግል ልትሰሚ ልትቀደር። እሊ ለትሰመ ዴራይ ጋራት ዲብ ማይ ክም ተሓበረ በቃዐት ማይ እንዴ ኣክረበ መደረት ዲብ ኣራውሕ እብ ፍንቲይ ህዩ ዲብ ወድ ሚን ኣደም ለኣመጽእ።

2. **ተዕዲን፡** ዲብ ኣሸቃል ተዕዲን ደመሮት ወተቅይር ሸክል ኣርድ ሳድፍ። ክምሰልሁም እብ ብዝሐ ርሶሕ ማይ ምን ኣሸቃል ኣትጫረዮት ተዕዲን ወመትባረዲ ልውሕዝ። እሊ ለልውሕዝ ፊሻይ ርሶሕ ዋጅብ ኣትናደፎት ኢገብእ እግሉ ምንገብእ ዝላም ክም ዘልመት እንዴ ተሐጸበ እብ ሸክል ውሒዝ ዲብ ናይ ማይ ጅዙእ እንዴ ተሓበረ ተለውሰ ክቡድ ሰብብ።

3. **ኤለክትሪክያይ ግማመት፡** እብ ኣሳስ እድንያይ ተቅይም ናይ ኤለክትሪክያይ መምተለነት እብ ፍንቲይ ተለፎናት ሞባይ እብ ብዙሕ ኣርቃም ወሰክ ክም ህለ ልትሸራሕ። እሊ እት ወግም ለኣተ ህዩ መፍርየት መኣሰሳት እግቡይ መትነፍያት ለከርበ ወለ ኣበረ ዓፍሽ ለከሰሰ ክቲብ መምርሕ እግል ለኣዳለየ ናይ ቃትን እልዛም ጀብረን። ምናተ መትነፍያይ እሊ ቃትን እሊ እንዴ ኢልትነፋዕ እት ክል ኣካን ክም ለክፍ ልትሸራሕ። ናይ እሊ መደረት ህዩ ምን ተለውሰ ለሳደፊዩ ባክት ለልትነፋዕ መጅተማንት መደረት ዳይም ሕማማት ቀርቡት፡ ኣተንፊሶት፡ ሐቀቅት ነብረ ክምሰልሁም ሰረጣን ለመሰል መደረት ሳድፍ ክም ህሌት ልትሐበር።

4. **ነሻጣት ሐርሱ፡** ክም ልትኣመር ብዝሐ ሸብብ እዲን ምን ወክድ ዲብ



ወክድ ዲብ ወሰክቲ ገይሰ ለህለ እብሊ ሰብብ ህዩ ጠለብ ናይ ነብረ እግል ልዕቤ ጠቢዒቲ። ጀላብ እሊ ምን ሐርስ ለልትረከብ እትይ እግል ኣበርካት ህዩ ለትፈናተ ኣግቡይ ክም ናይ ሐርስ ኬሚካሊያት፡ ሸፍር ወድድ-ባልዲን እብ ትሉሉይ ዲብ መንፈዐት ልውዕል ህሌ። እሊ ለትሰመ ህዩ እብ ራትዕ ኣግቡይ ኢትጸበጠ ምንገብእ እብ ውሓይዝ ዲብ ኣብሐር፡ ምሒጣት ወመራታት እንዴ ተሓበረ ተለውሰ እግል ልሰብብ ቀድር። መደረቲ ህዩ ዲብ መትነፍያት ማይ ወድዋር ዐባዩ ቲ።

5. **ዴማት ከህረበት፡** እትሊ ወክድ እሊ ናይ ሐፋነት ማይ ምን ዴማት ከህረበት ላተን መኣሰሳት ነክለሲያይ ጣቀት ወጃዝ ዲብ ለዐቢ ገይሰ ህሌ። እብ ሰብብ ባደሎት ናይ ሐፋነት ማይ ከራብ ጽበጥ ማይ ሳድፍ እት ህለ ናይ ሐፋነት ማይ ልትብህል። ዲብ ክኢኒ ሸቅል ለህለየ መኣሰሳት ዴማት ካህረበት እብ ሚልዮናት ቶን ለልትሐሰብ ናይ ሐጻይን ክቡድ ዲብ ድዋረን ለኣፈግረ ክምሰልሁም እብ ሰብብ እግል ኣብረዶት መቶር ለልትነፈዓቡ ውበዕድ ብዙሕ ማይ ዲብ ድዋረን ለልትረከብ ማይ ክፋል ዲብ ልክዕየ ቅያስ ኣክሲጅን ክም ነቅስ ወቅያስ መራረት ክም ዘይድ ወድዮ። ነቂስ ኣክሲጅን ዲብ ማይ እግል ባክተርየ ኣግቡይ እንዴ ኣዋፊሐ ህዩ እግል ኩሉ ማዳት እንዴ ኣመሸመሽ ቅያስ ለኣለቡ ጽበጥ ክም ለህሌ ሰበት ወዴ ብዙሕ ቅያስ ለቡ ዕሌል ከልቅ። ዲብ ለዓል ክፋል ማይ ብዙሕ ዕሌል ሰበት ለህሌ ህዩ እግል በርህት ጸሓይ እንዴ ገልበለ ተሓትያይ ክፋል ማይ ለኣጸልምት። ዲብ ደንገበ ህዩ ነቂስ ኣክሲጅን ወምት ኣራውሕ ለኣበጽሕ።

ዲብ ዐድነ ኤረትርየ ህዩ ለበዝሐ ሸብብ፡ ለልትሰቲ ማይ ነዲፍ ምን ከዛናት ወወሓይዝ ቲ ለልትነፋዕ። ክኢኒ ሰበትቲ ህዩ ምን መዳይን፡ ሕክምናታት፡ ናይ ኤለክትሪክ መኣሰሳት እብ ፍንቲይ ተዕዲን ወምን ብዕድ መኣሰሳት ለትፈግር ግማመት ውቁል መትኣካብ ወኢንደፎት እግል ልግባእ ወጅብ። እብ ፍንቲይ ህዩ ግማመት ለትኣክብ እቲ ባክት ምን መኣዛት ወወሓይዝ ለፊመ እግል ልግባእ ክም ወጅብ እንትባህ ለትሐዝዩ።



እንትብህ ሽዑብ ኤረትርዮ

**** መጋዜጅ ግድለ ገቢል ****

ሽዑብ ኤረትርዮ ክእን ለመስል ዋይዲባት ወክይናት እት ለህንጦጥል እቱ ሚ ወዴ ዐለ? እሊ ሰኣል እሊ እትለትፈናተ መራሕል ተእሪክ ልትረፈድ። ክመ ልትአመር፡ ለናይ በሺን - ሰፎዝ ውፋቅ እት መነዝመት መጅልስ ቅራን እት ክልኤ እግል ልትከፈለ ክምሰል ቀርቡ፡ ምነ ወካይሉ ሕነ ለልብሎ መሓብር ሲያሰት፡ ምነ እት ሰብ-ሰልጠት ብሪጣንዮ ወድዉ ለዐለው ሽክዋት ሐዋን ወኬን፡ ለገይሰ መቃወማት ኢትረኤ። ለገቢል ህዩ እብ ዓመት በርናምጅ መትከፋል እት ክልኤ እግል ልሰብሱ ለቀድር ደረር ለሳሚዕ ወዳሊ ኢመስል። ብቅት ውፋቅ በሺን - ሰፎርዝ፡ እብ መቃወመት ሽዑብ ሊብዩ ወሶማል እግል ዎርት ጅንስ በክት ክምሰል ናይ ኤረትርዮ ልታከየን ለዐለ ሐንቲ እስትዕማር ጥልያን ለዐለየ ድወል ለሳሪት ተ፡ እብ መቃወመት ሽዑብ ኤረትርዮ ክምሰል ኢሰረት እግል ልትአመር ወጅብ።

እት መደት ሕክም ተድላመ ምን ገብእ፡ መቃወመት ገቢል እት ናይ ዶሉ መሳእል ሌጠ ሕዱድ ዐለ። ተድለ ባይሩ እግል ትሸዐር እግሎም ለክድመው ልግብኦ ወለትተምነው፡ “ሐቅ ተድለ ሚ ልግበእ?” ለልብል ሰኣል እግል ልብለሶ ኢቀድረው ሌጠ እንዴ ኢገብእ፡ ለሐቅ ተድለ እግል ልምጸእ ለቀድር ቴለል ሐዲስመ ይሐሰበዉ ወኢትዳለው እግሉ። ቃኑን ወማርሒት ናይ ሐቲ መደት ሕድድት ምራድ ተቅዩር ለሀርስ ቀድር። እት ጅንስ ናይለ መጽእ ተቅዩር ተረት ወፈህም እንዴ ኣለብከ ዶል ትጸኔሕ ላተ፡ እተ እሉ ተኣቤ ዐልከ እግል ተዐቅብል ኣው ምኑ ለልትኬለም እግል ልምጸኣክመ ቀድር። ምን ተድለ እት ኣሰፍሀ በደሎት ህዩ፡ “ምን መቅሎ እት እሳት ነጠር” ምን ዐለ፡ ለገቢል እንዴ ኢልትዳሌ እግሉ ዐረ እቡ።

ዎርት ምነ ክእን ለወደዩ ኣሰባብ፡ ብዝሓም ምነ ምን ዶል እት ዶል

ሚርሐት ሲያሳያም እንዴ ገብአው ለኣዝሀረው ምዋጥኒን፡ ምነ ገቢል እግል ኣፍዝዖት ወነዝሞት ለከልኣዉ ወቅት፡ ሕድ እት ልትናወው ወልትሓገን ለኣብደዉ ወቅት ሰበት በዝሓ ቱ። ዳንዩ መሕከመት ለዓሊት ለዐለ ብላተ መለስ ፍሬ እብ ክሰሱ እሊ እት ልትሃይ፡ ክእን ልብል፡

እተ መደት ለህ መርሐ ለዐለው መብዝሐም እግል መሳልሐም ወደዋይሐም ለክድሞ ቶም። እብ ዓመት “እቅጣዕዩን ኤረትርዮ” መ ልትብህሎ ሊብሎ እንድ-ኢኮን፡ ደረጃት እቅጣዕዩን ባጽሓም ይዐለው ለሆም። እቅጣዒ ለልትብህል፡ ሒለት እንዴ ከወነ ምን ዐዱ ወሕክሙ ለካፌሕ ቱ። ምን ወጠን ኢኮን ምን ዕያሎምመ ለኢከርዐው ቶም ስሚት ሚርሐት ራፍዓም ለዐለው።

እትሊ ጋር እሊ ደጃዝማት



ወልዴዮህንስ ገብሬእግዚእመ እግል ኬትባይ ክእን ለተሌ ቢለዩ። “እብ ክሰሱ እሊ ተሀድገ ለህሌክ መደት (መደት ኣሰፍሀ) ትከትብ እት ህሌከ፡ ክልኡት ጋር እት ልብከ ውዴ። ለኣወላይ፡ ገቢል ምንመ ልቅህር ለኣትማርር ወኢቀሰን፡ በናቢን



ኢርኔስት ቤሺን ናይ ብሪጣንዮ ወ ካርሎ ስፎርዝ ናይ ኢጣልያ

እንድ-ኢኮን እንዴ ትከምከመ ሕበር ወድዩ ለዐለ ኢኮን። ሰበት እሊ፡ ሚርሓይ እንዴ ገብኣክ ኣዳም ብዩ እት ትብል ቀደም ሐለፍክ ምን ገብእ፡ ቴልየት ኢትረክብ። በይንከ ተርፍ። ካልኣይ ህዩ፡ እተ መደት ለህ ኣዳም ሺመት እንዴ ፈተ ጀላበ እት ልብል ብዞሕ

እብ ሺመት እግል ልትቀሸሽ እት ምስምሰ ለዐለ።

ምናተ እሊ፡ መቃወመት ልቡለ ክሉ-ረኣሱ ይዐለት ለበህለት ኢኮን። ጀርቤ ኣሰፍሀ እግል መትሓባር ሻፍግ ምን ኣንፋር ኣልራቢጠ ኣልእሰላምየ መቃወመት ትርድት ሳደፈተ። ለጀርቤ እተ ዶለ ኢትከረዐት ምን ገብእ፡ እት መነዝመት መጅልስ ቅራን እግል ልሸከው ክምሰል ቱ ለሸፊሕ ጽበጥ ኣሰክ ህይሌሰላሴ ክቱብ ዐለ። ለመሻክል ላተ ኣልራቢጠ መትኣካብ ለናይ በዲር ኣንፋር ምን ኢገብእ፡ ክምሰል መሕበር ምን መሓብር ሲያሰት ምን ልትመስሐ ሐድ ዋድያም ሰበት ይዐለው፡ ከብቲ ህይብቶም ይዐለት። ክሉ ግረ እሊ ለነህድጉ ነሻጣቶም ህዩ፡ እብሊ መሻክል እሊ ሰበት ተዐናቀፈ፡ እብ ስሚት ኣልራቢጠ ደለ ተሐረከው፡ ክምሰል ኣፍራድ እንዴ ልትሐሰሱ፡ ሕጌ ናይለ ናይ በዲር እት ልትነከው ወልትክልኦ፡ እብ ዎር-ዎርት እግል ልትነዐምም፡ ወልትዕገገ ወልትኣሰር ቀሊል ዐለ። እግል ልትቃወም ወጥኖ ለዐለው ኣል ራቢጠ ሌጠ እንዴ ኢገብእ፡ ኣንፋር መሕበር ሸቃለ ወመሕበር ሸባብ ፈደራልየት ኤረትርዮንመ እትክምሰልሆም እግል ልትፈለው ላዝም ገብእ።

ቀደም እሊ ለሀደግናሁ ተቅሪር ሰለለ ሕክመት ኣሚርኩ፡ እብ ክሰሱ መቃወመት ገቢል ለበለዩ፡ እግል ቴለል ናይለ መደት ለህ ሰበት ወዴሕ፡ እብ ፋዬሕ ህዲጉ ለኣትሐዘ።

ናይ መቃወመት መሓብር ሲያሰት በደ ኣው ሞተ። ምናተ፡ ሕስር ገቢል ወሰእዩቱ (Speculation) እት ፈደሬሸን እተ መደይን ኢነቅሰ። እብሊ ሰብሰ እሊ፡ ክምሰል ከረ እብራሂም ሰልጣን ለመስሎ፡ ሚርሐት ሲያሰት ሽዑብ እንዴ ዝመው፡ ሐምያት እግል ልፈንጥሮ፡ ናይ ደዋይሐታት ሸኩክ ወፈርሀት እንዴ ሃረሰው ረኣይ ገቢል ድድ መትሓባር ክምሰል ወዴሕ ወዱ ህለው። እሊ ለመሰል ተውዕያት ቀንጽ ወህምድመ ምን ህለ፡ በደል ናይለ ውሕደት ወንዛም ወማርሒት ዋቅየት እንዴ ሐግለ እግል ለኣተላሌ ለኢቀድረ

መሓብር ሲያሰት በዲር እግል ልግበእ ቀድር።

ለተቅሪር፡ ኢገናዐት ሽዑብ ኤረትርዮ እተ ምን በዲርም መትቃውመት ለዐለው ምዋጥኒን ሌጠ እንዴ ኢትትሐደድ፡ እት ኣንፋር መሕበር ሕብረትመ ክምሰል ዐዴት ኣሸረ። እሉም እግል ዓይን-ባይን መሰኡሊኖም ወድዉ ለህለው ዓረኮት ወኣትሻካት እት መትሓባር ሻፍግ ኢፈተዉ። ድድ ናይለ ዐለት ሰእዮቶም ህዩ፡ ፈደሬሸን ክምሰል ገብኦ፡ ጋብእ እግሎም ለዐለ ናይ ሰላዲ ልግበእ ወብዕድ ኣቅዋል ኢተመ እግሎም። እሊ ክሉ ህዩ፡ ሕክም ተድለ ባይሩ ዘልሚን ለልብል ሽዑር ሰበት ትወሰከዩ፡ ኣሰክ ገሌ ምን ኣንፋር በርለማን እትሊ ናይ መቃወመት ከሌብ እግል ልትሓበሮ ኣው ምስሉ እግል ልትሳደው ቀሰበዮም። ለተቅሪር ረኣዩ እት ለኣተላሌ፡ እሊ ለተሌ መላካዛቱ ከትብ።

መትቃውመት እት ቀበት ለትፈናተ ናይ ዲን ወቀባይል ኮማት ኤረትርዮ እንዴ ተሐደደው፡ እት ደዋይሐም እግል ዐለ ሰልጣት ኣቶብዩ እግል ልክረዕ ለቀድር ሐረካት ሲያሰት ድቁብ እግል ልክውኖ ወልትሐየሶ ኢቀድረው። (እብሊ ሰብሰ እሊ) ኢገናዐት (ኢሲካበት)፡ እብ ኣፍራድ ወለኢትነዝመ ናይ ደዋይሐታት ኣፍዓል መቃወመት ሌጠ ልትሸረሕ ህለ። እት ቀበት በርለማን ኤረትርዮመ፡ ኣሰክ እሊ እተ መትኣታይ ኣቶብዩ እግል ልክርዮ ለወድዉ ሕላታት፡ ሕውንነ ዋዴሕ ናይ ሄራር ሒለት ትሉሊት ለቡ (ኣው ደቅብ vigour) ወሸፋግ ሲያሰት (Adroitness - በሰር) ወዱ ጸንሐው። መትኣታይ ኣተላላ ምን ገብእ፡ እሊ ኣከላጣት እሊ መን-ኣመራ፡ መቃወማት ዋሴዕ ሰበት ኣለቡ፡ ጀርቤታት ኣቶብዩ እግል ዐሚም እግል ልካፊሕ ሒለት ኢረክብ ገብእ። እብሊ ቶም ህዩ ኤረትርዮን ለመትቃውመት እግል ልትዐውቶ ገብአው ምን ገብእ፡ እግል መትኣታታይ መጅልስ ቅራን ቂመት ለለህዩቡ እቡ።

ቀድየት ኤረትርዮ እብ ነወ እንክር ለከፊት መነዝመት መጅልስ ቅራን ህዩ፡ ኣዜ እንዴ ዐቅብለት እግል ትሕሰብ እግሎም ለኢገብእ ቱ። እሊ ጌሰት ምንዲ ትገይሱ፡ መንገፎ ኤረትርዮ እት መቃወመት ገቢል ሕድግት ህሌት። ተቅሪር ሰለለ ለበለዩ ላተ፡ ለመቃወማት እት መደይን ወእቱመ እት ሐዳም ኣፍራድ ሌጠ ሰበት ተሐደድ፡ ሕክመት ኣቶብዩ እግል ዶሉ ሌጠ ምን ኢለኣፈረሀ፡ ድቁብ ወለኢልትከረዕ እንዴ ገብኦ፡ ምን ናይ ዐሚም ቀረደ እግል ልምነዐ ቀድር እንዴ ትቤ ሕስርመ ይህበቱ። እብሊ ሰብሰ እሊ፡ ለዐለ ህድግት ለህሌት ጀርቤ መትሓባር ክምሰል ኢትሰርገለት፡ ዝያድ ለትሰርገል ወደማን ለበ ገበይ ብዕደት እግል ትባሰር ኣንበተት።

ልተላሌ.....



وقوفاً من اليمين: سليمان محمد عبدالله، محمد سعيد أبرار، علي راداي، الشيخ عبدالقادر محمد صالح كيري، الشيخ إبراهيم سلطان
علي، محمد حسن نائب، ياسين أحمد باتوق، محمد عثمان حيوتي، الحاج سليمان عمر، دقيات حسن علي، قاضي موسى آدم عمران
جلوساً من اليمين: غير محدد، غير محدد، أحمد كوريبا، سعد صالح، سليمان مريز



ፈሸል እንቡተት ነጃሐቱ - መዐልመት ሰሚረ ገበይ (2^ደ ወናይ ደንጎበ ክፈል)

መዳረራት (ዳይሬክተር) አወላይት ወምግባይት ደረጃት መድረሰት አነሱር - ተሰነይ ላተ መዐልመት ሰሚረ እድራስ መሐመድ (ሰሚረ ገበይ) እት መሀረጃን ኤረትርዮ 2026 ለገብአት ምስል መቃብለት ካልእ ወናይ ደንጎበ ክፈል ልተላሌ፡-

መዐልመት ሰሚረ 26 ሰነት ለአድራሰት ወአሰክ አዜ ተአደርሰ ለሀሌት ተ። መዐልም እብ ዕን ለልትረኤ አንዋል ወተጃረት ኢመልክ ገብእ፡ ምናተ፡ ደሚሩ ዳይጃመን እብ ፈረሕ ወገናዐት ምሉእቱ፡ እግልሚ፡ እብ ሰኔት ለፈቁዳ፡ ለልትሐብኖ እብ ወለፈትወ ደረሳሁ ደለ እተ ጌሰ ሰበት ጸንሕወ ፍሬ ተዕቡቱ እብ ዕንቱ ልርእዮ፡ ደረሳህ ደካትረ፡ እንጅኔራት፡ ጠያፊን እንዴ ገብአው “እለ መዐልመቹ ተ” እት ልብሎ ምስል ጸርም ለአትአመረ እት ሀለው፡ ሰሚረ ክምለ ታጅ ለሰቅለት እንዴ ገብአ ልትሰመዐ ወትፈይሽ እቦም፡ ለወቀዩ ገናዐት ለሀይቡ፡

ጸንም መዐልም እት ፈሰል ምስል ሰቡረት ወጠባሽር ሌጠ ኢኮን፡ እተ ዲቡ ነብር መጅተመዕመ መሻረከቱ ወተውጃሁ ለልትሐዜ ሚርሓይማ ቱ፡ ሰሚረ እት መሀረጃን ኤረትርዮ 2026 ምስል አርዛቅ ጋሽ እግል ተአትአምር መዝ ሀይብት ዐለት፡ ምነ ብዙሕ ሀይ እት ርክን ናዩ ዐርኮካባይ ወፈርያቱ ወ’ሁር’ ለልትባህል ብድረ ኢሐ ትሸፊሕ ዐለት፡ ‘ሁር’ እትላ ሐልፈ ወሬሕ ጃላይ እት ዓሙድ ፈን ወዓዳት ክቱብ እቡ ዐሉ፡ እግል ዐርኮካባይ ሀይ ከአፎ ትሸርሐ ንርኤ፡

ዐርኮካባይ ለእብ ልትወሰፍ ከሊማት ልውሕድ እትክ፡ ግርመት ዲቡ ትትወሰፍ፡ ወለት ረያም ሐመልማል ዶል ትገብእ “ሐመልሚለት ወጅሀት ዐርኮካባይ ብዋረተ” እት ትትባህል ትትሐሌ፡ እተ ሐላይሉ እብ ፈርያቱ ዲብ ሸንን ገናበትከ ፈሰሰ፡ እብ መናፊዕ ምን ልትረኤ፡ ጋሽ በርክ ክለ መንበርህ እት ዐርኮካባይ ትተንክብ ምን እንብል የአትራዘቅኤ፡ ለቤት ኖሰ ምን ከርሰ ወከደክ፡ ምን መሰረተ እት ንቅረተ፡ ምን ከድቤተ እት ቅምቤተ፡ ሐሽ ወሐረተ ምን ዐርኮካባይ ጋብአት ተ፡ ለዐርቀይ ደንቃሁ ምን ዐርኮካባይ ለእቱ ንትገሴ ከራሴ፡ ወለዲብ ነአስተሬሕ ዐራት ዐንገራብ ሕባለ ምን ዐርኮካብ ቱ፡ ለቤትን ወሽዋሬዕን እንክሰትር እቡ ለትፈናተ አንዋዕ መከሳትር ፈርያት ዐርኮካብ ቱ፡ ለተካይብ ዲብ ምድር ልትመደድ፡ ለሰጋደት ለእት ንትሰሌ፡ ለጀናቢል ለእቱ እንረፈዕ፡ ለመሻርፍ ለእቡ እንበድብድ፡ አነግር ነአፈግር እቡ ስተተ ወለእነግር ነአፈግር እቱ ሰፍኤ፡ ለእክል ነአክብ እቱ ግፈት፡ ለንዋት ቡን ነአክብ እተ ሰለት፡ ለጢሾን ወግራብ ብዕድ እንሰቅል እቱ፡ ተብልን ለጸውር ውሰቱ ሐሊብ ለንትክበት እቱ ወእንወጽር እቱ አግርበት ክም ተብል ወእፈ፡ ከርት ወዐሙር፡ መገሰይ ጀበንት፡ መገሰይ ተነት፡ ሰፋል መዋሐን፡ ሀለሌ ጅክ ቤትን ለለአገርም ለትፈናተ ቅለው



ወአክ’ረት፡ ሐራይር . . . ክሉ ምን ከዐሌቱ ለልትሸቄ ወከዐሌ ቀጠፍ ዕጩይ ዐርኮካብ ቱ፡ ከእብሊ ዐርኮካባይ ግርመት፡ ሕሸመት ወሐብን ጋሽ በርካ ቱ፡

እተ መዕረድ፡ ሰንገደ-ሕባል፡ ለትፈናተ ቅያሰ ለብእቱ ሐፋት (ተብል)፡ ለትፈናተ አሸካል ጀናቢል፡ ሀለሌ፡ መሻርፍ፡ ጀላል ወግርመት ቤት ወመአክብ ሓጃት ቃሊ ክም ሰርጎ ለገብእ ፈርያት እዴ፡ እት ረአሰ ለልትሰበስ ጥዩግ (ቁቢዕ) ወብዕድ ሰፊ ወፍዕሎ ፍሩሽ ዐሉ፡ ለእብ ብዝሐ አዳም ለበጥር እተ ወለልትሰአል ምን ዐለ ሓጃት ላኪን ሀለሌተ፡ ሀለሌ ናይ ከዐሌ፡ ዐቢ ወንኡሽ ልትፈከር እቱ ዐፍዩ ወረዋሰሱ፡

እሊ ሀለሌ እግለ ጅን ለጠዐመ ራሐት ለለሀይቡ፡ እንዴ ኢልትዳዩግ ሀወ እት ረክቱ ጨነጨት ወብዕድ ባልዲን እግል ኢልትገሴ ምንለዐል ላንሰ እት እንቱ ለሰክብ እቱ እማቱ ምን ከዐሌ ለልፍዕላሁ እሉ ቱ፡ ሀለሌ እት ገባይልን ልሙድ ቱ፡ መብዝሐ ሀይ እት ቅትብ ዐርቀይ አው ዓቃብ

ዐራት ሽልቱት እንዴ አሰርካቱ ለገብእ፡ እሊ ናይ ጋሽ በርክ ለእብ ከዐሌ ልትሸቄ ሀለሌ ላኪን ፋዩሕቱ፡ ለጅን ሰኔ እንዴ አስተረሐ ለአከርር እቱ፡ ምን ተሐዜ ክም ልትሀንዝዝ ትወድዩ ወምንተሐዜ እት ረአሰ ዐራት ትከርዩ፡

ለካልእ አዳም ብዙሕ ለዐፍዩ ወልትፋከር እቱ ለዐለ ፈርያት ዐርኮካባይ፡ ጀናቢልቱ፡ ለጀናቢል እብላ ትፈናተ ቅያሰ ፍዑል ቱ፡ ምን ሐቱ ኪሎ ለጸብዋ አሰክ ዐሰርታት ክዋሊ ለልሐይብ፡ ሓባሩ ወመግትኩመ ለትፈናታቱ፡ እሊ ፈርያት እሊ እት ረአሰለ ግርመቱ ዓፍዩትማ ቱ፡ ምን ምስል ኪሰ (ፊሰታል) ለመጽእ ከሚካላት ለሰብሱ ክሰሐ ድዋር ወክብረ ለአድሕን፡ ፊሰታል ሐቱ ዶል እንዴ ትነፈዕክ እቡ ልትሰከፍ፡ ክም ትለከፈ እት ክል አካን እንዴ ትሰንፈረ ንዋይ በልዑ ከለሐምም እቡ፡ እት ምድር ለልደፈንመ ሰበት ኢመሸምሸ ጨበል ሰምም፡ እተ አትክል እንዴ ትሳቀቀ ዕጩይ ወብዕድ መክሉቅ ኢሰሰን ወኢሰኔ፡ ሰበት እሊ ጀምቢልን ክምለ ውሩድ ወክምለ ዝሁር እግል ንርኣዩ ብክ፡

ዮም አዳም መደረት ፈሰቱላት አክለ አመሪዩ እትላ ጠቢዐታይ ፈርያትን ለአቀብል ሀለ፡ ዲብ ዳሳት ህዳይ ለንአነትጋርም እቡ ሰርጎ ፈርያት ዐርኮካባይ ገብእ ሀለ፡ ዲብ ጋሽ በርክ ሰለሰ አርበዕ እብ ሐጅም ንኡሽ ለትዳለዩ መሸፈፈት ምስል እንዴ ወደወን ምንለዐለን ውሩድ ወዱ እተን ከሳቁለን፡ እሊ እግለ ዳሰ ለለሀይብ ግርመት ፍንቲት ተ፡

ዕጩት ዐርኮካባይ ከዐሌ ሌጠ ኢኮን ለእንረክብ ምክ ነብራመ ብእተ፡ ለሰመረት (ዐኬተት ዋልት) እባህ ትብለዕ ሰኔ ዋዕምተ፡ ሺሽራት- ዐካት ኢይብስት ወኢዋልት ሰኔ ትፈሐቅ፡ ለዐካት ለይብስት ለደጊገዐሲር እግል ልግበእ ቀድር፡ እት ትፍሕቀ እግለ አንጃብ እት ነዳፊቱ ወመትረዱ ለብእተ ዶር ቀሊል ኢኮን፡ ወእግለ በለዐ ለተሀይቡ ናይ ገናዐት ሸዑር

ወሰፍ አለቡ፡ ለእት ቀቡተ ሀሌት ዐኬተት ምን መክሕለት እንዴ አንበትካ እትላ ትፈናተ መዓል ትውዕል፡ ሐበት ትለከፍ ምን አለቡ፡

እሊ ክሉ መናፊዕ ለብእተ ዕጩት ዐርኮካባይ ክምለ ውላድን እግል ነሓፍዝ እተ ብክ፡ ግምሽ እግል ትቀረጭ አለቡ፡ ምን እሳት ወምን አይ አዘ እግል ንሕጀብ እህትማም እግል ኒዴ እተ ብክ፡ ለዘዐፍ ኖሱ (ለከዐሌ) ምን ዋድቅ ወምን ይቡሰ እግል ንእሬ ብክ እንድኢኮን ለጥሉል እግል ንቅረቡ አለብክ፡

አንሳትን እሊ ርዝቅ ጠቢዐ ምን አርትዖት መሕገዝ ቤተን እንዴ ሐልፈዩ፡ ምስል ዘበን ለገደሰ ለትፈናተ ፈርያት እት ዕዳገ ከርዩ ሀለዩ፡ ፊድል እለ ንዕመት ቤተን ለአገርመ፡ ወቅተን እት ቤለ ወትብሀለ ኢለሓልፈ፡ እብ ዕን እተይ ምን እንርእዩመ እግለ ዓይለት ፋኢደት ቱ፡ መጣርቅ ብዙሕ ደቤእ፡ ለእሉ ሸቂት ጀምቢል ልግበእ ወመሸፈፈት ሱግ እንዴ ከሬት ለተሐዝዩ እንዴ አቅዴት እት አጀኒተ ተኣቱ፡ አንሳይት ኤረትርዮ ግርመት ዐድ፡ ድራር ዓይለት እግለ ዐደ ሐራር ወሕሸመት ተ፡ ዕላመተ ሀይ ፍንቲት ተ፡ እት ዐለም እት ድፈዕ እንዴ ሸፈት እት ጀብሀት ቅታል ለተሓረበት እምበል ኤረትርያይት ኢሀሌት፡ እት ዐድ ሀይ እም ወአብተ፡ ውላደ ውበእሰ እት ድፈዕ ወዐማር ወጠን እንዴ ሳረሐት አካን ክሉ እንዴ ደብእት ወጠን እብ ሐበክ ወሕሸመተ እግል ትንበር ለሸቂት ወለተዐወተት አክል ኤረትርያይት ሀሌት ይእብል አክ፡ ከህላተ ጃይብቱ፡ እብ እስትሸሃድ ውላደ ወሐዳረ ሕርዮት ክም መጽኢት ለመጸኢት እንዴ ጅወ ቀብረተ ዕላል ወዴት፡ ኤረትርያይት ክቡድ ሚዛናተ ረቢ ዕምር ወዓፍዩት ለሀበ እክ፡

እለ ትመስል እም ዕልም እግል ትክሰብ ሕክ ለዳርሳም እግለ በክት



መዐልመት ሰሚረ እድራስ

ድራሰት ለኢረክበዩ እግል ነአድርሰን ዋጅብናቱ፡ ኣነ እብ ክለ ንዩትፍ ደለ ትጠለብ ምንዩ እግል እውዴ ዱሊት አክ፡ ፊናይ እግል አንሳት ኤረትርዮ ሀይ፡ ለዕላመት ወጠንዩት ላተ አንሳይት እብ ዕልም እግል ትወቀል ብእተ፡ ክምለ ዐረብ ለልቡለ “አል ኡም መድረሰቱን፡ ኢዛ አዕደድተህ ዐደድተ ሸዕበን ጠይብ አልዓዕራቂ” በህለት እም መድረሰት ተ፡ ዕልም ሴፊካህ ምንገብእ መጅተመዕ ውጃሁ፡ ዕጉል ወዓቅል ክመ አዳሊካ ቱ፡ ድራሰት ሀይ ዕምር ሕዱድ ወወቅት እመር አለቡ፡ ምን ገብእ መድረሰትኪ እንዴ አትመምኪ ተሀይይ፡ ቀደሙ ለተትዩ ህዳይመ ምን መድረሰት ኢከሬዕ መድረሰትኪ አተላሊ በሰ በዐል ሀይፍ ግብኤ፡

እግል እማት ለእብላ ሀይ አዋልድክን ምን መድረሰት ኢተአትርፈ፡ እንትን ዋላድያት ሌጠ ይእንትን ኢኮን እግል ውላድድክን እግል ሐዳርክንመ አዳም ትወድዩ፡ አይ እናሰ ዐዘም ግራሁ እሲት ፋርሰት ሀሌት፡ መሻክለ ብዙሕ እት እንቱ ክልቀት ሰብር፡ ሐናን ወፈተ መነሐተ፡ ወሰብር ገበይ ነጃሐቱ፡ እብ ሐናንት ወመትሰዳዳይ ዕደልኪ ለዐል እግል ትወቅሊ ወናሰኪ እግል ትትወቀሊ ቅድረት ብክ፡

አንሳት ዮም ምን ቀዳምያት መናድላት ወዝያድ ብክ ወተዕሚር እግልን ልትጸበር ሀለ፡ ኢደረሰክ፡ ኢሰበርክ ወኢትሳዴን ምንገብእ ተዕሚር ኢሀለ፡ ከእንቲ ታክያት ግብኤ፡ እግል አጀኒትኪ፡ እናሰኪ ወሙጅተመዕኪ ሰፊሕ ሻምኽ (ትምሳል ባይን) እንቱ ። ውላድ ተብዕንመ ለእሲትክ ጅክእ ምንክ ሰበት ገብአት እተ እለ ተሐዜ ደረጃት እግል ትብጸሕ መጣረ እግል ትብጠር ዋጅብክ፡ ለገብአት እሲት ግራህ እናሰ ፋህም ወፋርሰ ሀለ ምንገብእ ዕውትት ወዋቅዩት ተ፡ ከእት ፈራሕክ ወከራህክ እናሰክ ወእሲትን ምስል ንብጠር፡ ኣነ ክም ሰሚረ እትላ አዜ ለሀሌክወ ለአብጽሐኒ በዲር አቡዬቱ ወዮም ጸዋዬ፡ እድንዩ ሀይ ዐድሕድ ዲብ ተአትካምል ምን ትክብራተ ለትዋዕም እትክ ወለተአወቄ እተ፡



ምን ፈርያት ከዕሌ



አድመኖት መንገፎ መኅት (2^ኛ ወናይ ደንበን ክፋል)

ዓፍየት መጅተመዕ፡ እት ደማንላ በልዑ ወለሰትዩ ነበራት ተአተንኩብ። እት ኤረትርዮ ዐድነ፡ ፈርያት ንዋይ ክም ሰን፡ ሐሊብ፡ ቤጭ፡ መዐር፡ ወብዕድ ክም አግደ ክሳር ልትዐለብ። ምናተ፡ እብ ሰብብ ይአመር፡ ዓፍየት ገቢል እት ብቐት እግል ትትካፊት ትቀድር። ከእሊ ክቱብ የም፡ እት ደሐን መኅት-ሐሊብ፡ አግደ ላቱ ሰኣላት በልሱ፡ ደማን ለቡ አግቡይ መትደጋግ መኅት እግል አደቃብ ለሀደፋ ቱ። ከየም መትደጋግ ዲብ ፈርያት ሐሊብ ሚ መሰል እግል ንሀደግ ቱ፡ ቅራኣት በኪተት።

ሰኣል፡ ናጊ ፈርያት ሐሊብ እግል ንርኩቤ እት ወክድ ሕልበት ወአክላል ሐሊብ ሚ መትደጋግ ለኣትሐዘና?

በሊሱ መንገፍ ሐሊብ፡ ምን ዑፊት ተዋብ ቱ ለልኣትብት። ሐሊብ ታመት መኅት እት ገብኢ፡ ጽበጥ ታጅር ለብኡቱ መኅት አዳም፡ ሐዋናት ወድድ አንፋስ ቱ። ምን ጠቢዐቱ

ልሕጸቡ ቡ። ለገኣ ሕማም ቀርበት፡ ጸልዐት ወስዕለት ለብዲቡ ነፈር እግል ልሕለብ ኢወጅቡ። ክምሰልሁመ ሕማማት ዐደዮ ለብኡቱ ነፈር ሐሊብ ኢለሐልብ።

እምበልሁመ ለሰልፋያት ክልኤ አው ሰለሰ ህራረት ሐሊብ፡ ባክቴርያ ብዙሕ ሰበት ጸኔሕ ዲበን፡ እት ከደን እግል ልትሐለበ በን። ሰበቡ ባክቴርያ እክሱሐን ሰበት ጸኔሕ ቱ።



ዲት ተላጅት ክርየት

መትክብህ ሰበት ቱ ላኪን፡ እብ ነዳፊት ኢትጸበጠ ምን ገብኢ፡ እብ ቀላል እብ ማይክሮባት (microorganisms) ክሴሕ። ሰበት እሊ ቀደም ሕልበት ጸፊዕ ወአዋባይ ናይላ ትትሐለብ ተዋብ እግል ክሰሐ አዋራፍ (ምን ጨበል፡ ሸፍር፡ አሸያናት ወብዕድ) ለመጽእ ድድ አንፋስ ቅሎዕ ሰበት ቱ፡ ነዳፊት ህይ፡ እሊ ድድ-አንፋስ እት ሐሊብ እግል ኢልኡቱ ትዳፊዕ። ሐሊብ ለልሐልብ ነፈር፡ እሰልፍ እደዩ እብ ማይ ነዳፍ ወሳቡን እግል

ለሐሊብ ልትሐለብ እቱ አግርበትመ እብ ብድረት (Detergent) እንዴ ተሐጸበ እብ ማይ ሕፋን ለዴሕ። ናይ ፕላስቲክ ቢዶኒታት (አግርበት) ባክቴርያ እግል ልትዋልድ ዲቡ ውጡይ ቱ። ሰበት እሊ፡ ምን ለኢሰግር አቻዮ አው አሊሚንየም ለትሸቀ አግርበት-ሐሊብ መትኅፊዕ ለሒሳ ቱ።

ሐሊብ እት ልትሐለብ ዲበ ኢነት፡ ቅያስ ሐፋነት ምን 37 አስክ 38°ሲ

ግሬድ በጼሕ። እለ ደረጃት ሐፋነት ህይ፡ እት ናይ ምድረት ቅያስ ሐፋነት (5°ሲ-60°ሲ) ህሌት። ሐሊብ እትለ ሐፋነት እለ ወቅት ሐቆ ክልኤ፡ እብ ዐስሮታት ኣላፍ ለልትዐለብ ባክቴርያ ልትባዘሕ ዲቡ። ሰበት እሊ፡ ሐሊብ እት ቀበት ክልኤ ሳዐት እት ልትሐዘኔ ቅያስ ሐፋነት በሀለት፡ ዲብ 4°ሲ ግ እብ ሻፍገት እግል ልብረድ አው እት ምን 70 አስክ 80 ዲ.ሲ.ግ. ለትበጼሕ ሐፋነት ነኣፈልሐ።

ሰኣል፡ ሐሊብ እግል ኢልኢኤ ለልትወሰክ ዲቡ ቀመማት (Preservatives) ሚ ምድረት ለአመጽእ እትኸ

በሊሱ እት ዐለም፡ ሐሊብ እግል ኢልኢኤ እንዴ ትበሀሉ፡ ክም ሃይድሮጅን ፔርኦክሳይድ (H2O2) ለመሰል ቀመማት ልትወሰክ ዲቡ። እሊ ላኪን፡ ሰኣ ምናዕ ወእግል ዓፍየት ኣደሚ ኤዘያይ ቱ። ሰበቡ፡ እሊ ኪማእያት እሊ እት ቀበት ገርብኩ፡ መሻክል ዓፍየት ክቡድ ክም አዘ ከርሸት ወብዕድ ሕማማት ዳይም እግል ለአምጽእ ቀድር። ሐሊብ ደማን እት ቡ መደት ረያም እግል ልጽነሕ እግልን ሐቆመ ገብኢ፡ ለዋርት ሐል እንዴ ሓንፈንካህ ሰኣ ዶል ተአበርዱ ሌግ ቱ።

ሰኣል፡ ሐሊብ-እንሰ እንዴ ኢፈሌሕ ልትሰቱ ገብኢ?

በሊሱ በታተን ኢልትሰቱ። እት ገሌ መጅተምዓትን እብ ለመድ፡ “ሐሊብ እንሰ ፈልሐ ምን ገብኢ፡ ሐሊቱ ተሐውን” እንዴ ቢለው እንዴ ኢለኣፈልሐው ለሰትወ ህለው። እሊ ላኪን ጊጉይ አፍዓል ቱ። ሐሊብ-እንሰ ክመ ሐላይብ ለብዕድ፡ ቁትላይ ባክቴርያ (ክም ሕማም ብሩሴላ ለሰብብ) ወብዕዳም ዴረት ድድ-አንፋስ እግል ልሰኩ ሰበት



እክኣል ሐሊብ

ቀድር፡ ዓፍየትክ ወዓፍየት ጸዋክ እግል ተአንጄ ለሐሊብ ላዝም እግል ልፍለሕ ወልልጸሕ ህለ እሊ።

ሰኣል፡ ምን ኢፈልሐ ሐሊብ፡ ውጩ ምን እሸቱ ደማን ቡ ማሚ?

በሊሱ ምን ይአፍለሐህሁ ሐሊብ፡ ርግኦ ሸቂ ሰኣ ኤዘያይ ቱ። ምን ሐሊብ መጠቅ ውጩር ሸቅየት በሀለት፡ እግል ሕማም ለልአመጽእ እት ሐሊብ ለጸኔሕ ባክቴርያ፡ እግል ልትባዘሕ በክት ከሊቅ ቱ። ሰበት እሊ፡ ውጩር ቀደም ኣዳላይ፡ ለሐሊብ ሰኣ ክም ፈልሐ እግል ንትኣከድ ምኑ ብኩ። ሰበቡ፡ ለኢፈልሐ ሐሊብ እብ ዕንታት ለይእንርእዩ ድድ-አንፋስ እንዴ አትባዘሐ ዲቡ፡ እት ሕማም ዊዳቅ፡ ሰዕለት ዐባይ (TB) ውብዕድ ሕማማት እግል ልካሬነ ቀድር።

ባክቴርያ ሕማም አቀልጥት ዲብ አዳም፡ “ማልታ ፌሸር” ለልቡሉ ለልኣትቃብል ሐዘ፡ ተዐበት ወመጽት መፋሰል ወዴ። ለሐሊብ አፍለሐናሁ ምን ገብኢ ላኪን፡ እሊ ባክቴርያታት እሊ ኩሉ መይት። ሰበት እሊ፡ እንዴ ኢነኣትወጭር፡ ሰልፍ ለሐሊብ እግል ልፍለሕ ቡ። ለእግል ተአርግኢ እንወሰክ ወጭረትመ ህይ፡ ለሐሊብ ዲብ ደረጃት 40-45 ዲግሪ ሲ.ግሬድ ክም በርደ እንወሰክ ዲቡ።

ሰኣል፡ ለልትሐለብ ሐዋይ ደወ ዲብ ክሰኣ፡ ለሐሊቡ እንዴ አፍለሐናሁ እግል ንሰተዩ እንቀድር መኣፋሉ?


በሊሱ እግል ንሰተዩ ኢወጅብ። ሰበቡ ህይ፡ ለአፍልሐት እግል ባክቴርያ

ድኢኮን፡ እግል እት ሐሊብ ለህለ ተረርፍ ሰራይ (drug residue) ኢለአበዴ። ለደወ ዲብ ሐሊብ ወሰን ወክድ ሰበት ነሰኢ፡ እግል ሐኪም ለህቤካት ሐብሬ ዕምር ፈዓልየት ቲማሞሁ አስክ ለኣተምም እግል ትታኪ ብኩ። አዳም ብዙሕ ሐሊብ ሰበት ፈልሐ ሌጠ፡ “እብ ተማሙ ለልጽሐ” መሰል እቶም። ሐፋነት ድቅብ፡ እግል ሕማም ለልአመጽእ ባክቴርያ ክም ሳልሞኣ ትቀትል። ምናተ፡ እግል ኪማእያይ ተረርፍ አሰርየት ኢለአበድዩ። ድድ-አንፋስ እብ ዓድየት ሐፋነት ኢበዴ።

ሰኣል፡ ሰን አው ሐሊብ “ክርብ” አው “ክሶሕ” ክም ህለ እብ ዕንታትን እንዴ ረኢነ ነኣምፋ ገብኢ?

በሊሱ እለ ንቅጠት ሰኔት ቱ። ክል-ዶል ውላድ አዳም፡ ነብረ ጸናህ አው ሕብረ ኢትብደለ ምን ገብኢ፡ ሰኔት ለአመሰሉ። እሊ ላኪን ጊጉይ ፍክር ቱ። ባክቴርያታት ስሙም ክም ሊስቴርያ (Listeria) ወሳልሞኣ እት ነብረ ዲብ ህለው፡ ጸኔ ሕብር አው ጠምጠም ናይላ ነብረ እንዴ ኢቀይር፡ እግል ልትባዘሐ ዲብ ቀድር። ሰበት እሊ፡ ነብረ ጸናህ ሰበት ሰነ ዲብክ ሌጠ፡ “ደማን በ” እግል ቲበል ኢልትቀድር። ደሐን ነብረ ኣከዶት፡ ምን ሰልፍክ እብ ነዳፊት ጸበጠ ወእተ ሰኣ አብሸሎተ ሌጠ ለኣተንኩብ።

መዳልያይ አሰይድ ዓወት ርእሶም ቅሰም፡ ቀዋኒን ወመታብዐት



ሰኣል ፍሬ-ካድም

“ክስሑ-መዐደይ እት ነብረ” (Cross-contamination) ሚ በሀለት ቱ?

ክስሑ-መዐደይ ነብረ ዶል እንብል፡ ለልኣከሴሕ ሓጃት ክም ቀመማት፡ ባክቴርያ፡ ዕሱ መትጸግዐት ሓጃት ወብዕድ፡ ምን ሐቱ ነብረ ክስሕት አው ህተ ለተምተመቱ ሓጃት፡ እት ነብረ ለነዳፍ ዶል ልትዐዴ ቱ። እግል መሰል፡ ሰን ዋራይ ለከተፍን እቡ ዐፍሽ ወጣውላት፡ እንዴ ኢነኣሕቡ፡ ሰለጠት ቀርደድን እቡ ምን ገብኢ፡ አውመ እት ኢበሽለ ነበራት ትነፈሳን እቡ ምን ገብኢ፡ ዲበ ሰን ለዋራይ ለዐለ ድድ አንፋሱ እት ነብረ ለሰኔት ልትዐዴ። እብ ፍንቱይ ሰለጠት ሰበት ኢትብሸል፡ ለድድ-አንፋስ ዱቅሪ እት ገርብ አዳም ለኣቱ። ሰበት እሊ፡ እግል ዋራይ ውበሹል ነበራት ለገብኢ ኣላት፡ ክል-ዶል በንበን እግል ኒደዩ ወጅብ። አውመ እት ክል ሸቅየት፡ እብ ማይ ነዳፍ ወመልጼሕ (ሊሊ) ወሳቡን-ብድረትss ሸሙይ ነኣነድፋ።

እብ ውሃረት ሐርስ ለልዳሌ ዓመድ ቅዘእ ለበ መኅት፡ እግል ክሉ ወእት ክሉ!

ሰማን ጠባዬዕ መኣንብተት ሽቅል (Entrepreneurs)

ዶ/ር ዑመር ዑሰማን

መኣንብተት ሽቅል ለልትቢህሉ አንፋር፡ እብ ናዮም በሰር፡ እክትራዕ ወብዕድ እንዴ ወደው፡ ሐዲስ ቀደም ኣዜ ለኢትሉመድ፡ ለኢዕል፡ አውመ እግለ ዐለ እብ ለሐሰት ገበይ ሽቅል፡ ለቀድሞ አንፋር ቶም፡ እሎም አንፋር ለበዝሐ ወቅት ሽባብ እንዴ ገአው ቱ ለጸንሐቱ፡ እግልሚ መናበረት ገበሎም ለተአሰኔ ሐዳስ ሓጅት ወገበይ እግል ልቅፈር፡ ወሽቅል እትለ ለአንብቶ እቱ ወቅት እብ እሎም ለትረዩሕ ወትነፊዕን ለልብለ ገበይ ሰበት ክድሞ፡ ምን ብዕዳም ዐባዩ መኣሰሳት ተጃረት ለለኣሰቡዳ አንፋር ልትፈንተው።

ለህለ እሎም ረአሰ ማል ሐድ ቱ፡ ። ምህም ቅውቶም እት ፍክርም ወበሰርም ትተንኩብ። መኣንብተት ሽቅል ለልትቢህሉ አንፋር ምስል ምህዞ ወሰናዐት ትርድት ዕላቀት ቦም። ሓጃት፡ ዐፍሸት ወኣላት ካድም ለአሰኑ፡ ጠውሮ ወልምህዞ። ከእግል ዮም ታጅር ወድ አምሪክ ላቱ ሮበርት ክዮስኪ እብ ብሐሰ ለረክበዩን፡ ሰማን ምህም ጠባዩ መኣንብተት ሽቅል (Entrepreneurs) እግል ንቀደም እክም ቱ።

1. ክል ዶል እግል ትድረስ ዱሉይ ግባእ

እለ ትሰዴ ወተአለምቤ ለህሌት እድንዩ፡ እት ክል ካልኢት ትትቀየር ህሌት። እት ትትቀየር ህዩ ምስል፡ ዕልም፡ አምር፡ ገበይ መንበረት ወሽቁ፡ አብሳር ወብዕድ ክሉ ልትቀየር ህለ። ዐባዩ ወታሪክ ረዩም ለበን መኣሰሳት ምስል ወቅት ለበንያሁ ጠባዩዕ ወዕላቃት ሰበት በን፡ ዩምክን እብ ቅሩታዮን እት ገይስ እግል ልጽነሐ ቀድረ። ክም ሐዲስ መኣንበት ሽቅል ላኪን፡ ምስል እድንዩ እግል ተአሳድር ኢጀረብኩ፡ አሽቃል ከአፎ ተሉ ህለው ሐቆ ኢደሌኩ፡ ዐማይል እትሊ ወቅት እሊ እትሚ ልትአየሶ ህለው ሐቆ ኢደሌኩ፡ እግል ትክሰር ሌጠ እንዴ ኢገብእ፡ እግል ትክሰር፡ ሽቅልክ ትድበእ ወትብዴመ ትቀድር። ከክም መኣንብታይ ሐዳስ መኣሰሰት ክል ዶል እግል ትድረስ ወኣብሳርክ ትቀይር ላዝም ብገሱ ገበእ፡ ወእብ ፍቶሕ ምክ ወፍክር መትበጋስ ለአትሐዜ።

2. ኢረኪብ ግሩሽ ምን ካድምክ ወመባጽሕክ እግል ለአብዋረክ አለቡ

ሰሩ አውቃት፡ ለተአምን ወደምን እቡ በሰር አው አንበቶት ካድም እት ህለ እኩ ሕዲን ግሩሽ ዶል ሳድፈኩ፡ ኢትትአሰፍ ወሄራርክ ኢተአብዋር። ፈክር፡ ምን እግል ልሳዕደክ ቀድር ሕሰብ፡ አግቡይ ጀዲድ ቅፈር፡ ክትብ ቅራእ፡ አብሳር ሕዜ ወብዕድ። ትብኔትክ ወአስክ ለትወድዩ ካድም ላኪን



ኢተአብዋር። እግልሚ ሰሩ አውቃት፡ 1፡ 3፡ 9፡ 99፡ 999 ዶል ወብዕድ እንዴ ወደቀ ቀኒጽ ወሀቀሁ ዐውቱ ለለአክዶ አሽቃል ሰበት ህለው። ዮም ማል ሰበት ሰአንክ ፈጅርመ ክምሰልሃተ ባህለት ኢተን። ክል ለትጸቤሕ አምዕል ሓዳስ ተ፡ ወምስተቅበል ጸብጡ ለህለ በክት ለአምሩ አለቡ። ለላሊ ወአምዕል ከድሞ፡ እንዴ ወድቀው ለቀንጾ ሰአየት ለኢበትኮ አንፋር ላኪን ለሐሰ በክት ወምስተቅበል ናዮም ቱ።

3. እት መባጽሕክ ወጽበጡ እት ኢተን እት ግሩሽ ብዙሕ ኢትትአየሰ

መባጽሕኩ ምህም ቱ። ዐድል ለመበገሲሁ፡ መሰለሐት ብዕዳም ለኢተምትም፡ ራቴዕ ወእት ዕልም ለኢተንከበ መባጽሕ አንበቶት መኣሰሰት ዶል ለህሌኩ፡ እቱ ሌጠ ክድም እት ኢተን ምን ሽቅልክ ኢተአብዋር፡ አተላሌ፡ ሐቱ አምዕል ዐውቱ እትለ ኢትጸበርካህ እቱ ወቅት እግል ትምጸእኩ።

4. ምን ዐደድ ወለዐል እት ሽቅል ጽመድ ወወቅት ለአለቡ ኢትግባእ

ሰሩ አውቃት ምን ቅያስ ወለዐል ምራድ ወትምኔት መትዐዋት ዶል ተህሌ እኩ፡ መሕበራይ መንበርን ወዕላቃትን ምኑ እንዴ አዘምን እት ሽቅል፡ ላሊ ወአምዕል ጽመዳም እንገብእ፡ እብ ናንቱይ፡ ክም ሐዳይስ መኣንብተት ሽቅል። እት ክም እለ ሓሰት፡ ሐር እብ ግሩሽ ለኢነአመጽኡ አብኹት ወመክሰብ መሕበራይ ሐዶት እንከር። ሰበት እሊ ክም ሐዳይስ መኣንብተት መኣሰሳት፡ እት መሕበራይ ዕላቃትን እግል ንትአየሰ ወወቅት ንፈንቱ እሉ ወጅብ።

5. ማልክ እንዴ ከሰአካሁ፡ ማል ክም ለአመጽእ እክ ውዴ

መኣሰሰት ዶል ብኩ፡ በደል ለህተ ተአመጽኡ እክ መክሰብ እት ተአክብ ሌጠ ትነብር፡ ለመክሰብክ እት ብዕዳት መኣሰሳት ዶል ትከሰኡ፡ እንተ እት ምግሳይክ ዲብ እንተ መክሰብ እግል ትርከብ ቀድር። ለአወላይ ፍክር ክሰኡት ረአሰ ማል ወመክሰብ ህዩ፡ በደል እግል ግሩሽ ሽቁ፡ እንተ ግሱይ እት እንተ ግሩሽ፡ ኖስ እንዴ

ሽቁት መክሰብ ዶል ተአመጽእ እክ ቱ። ላመ ኖስክ እንዴ ከደምክ ተአመጽኡ መክሰብ ምስለ ምን ክሰኡት ማል ለትረክቡ መክሰብ ዶል ተአትጃግሩ፡ ለአግሩሽክ እንዴ ከሰኡት ረክቡ ማል በዜሕ።

6. ሐዲስ ሽቅል ኖስክ ሰበት አንበትኩ ማህየት ትነሰእ ምኑ ለዐልክ ብዕድ ሽቅልክ ኢትእዘም ምኑ

ሰርም አንፋር ሐዳስ መኣሰሰት ዶል አንበተው፡ ለእተ ሽቁ ዐለው መኣሰሰት ወካድም ለአዝሞ ምኑ። ክም ሐዳይስ መኣንብተት መኣሰሰት፤ ክል ዶል፡ ለሐዳስ መኣሰሰትን ላዝም ብዕድ አሽቅል ለኢትሰሚሕ ኢገኡት ምን ገብእ፡ ማህየትክ ወሽቅል ኢትሕደግ። ተውሳክ ሰደየት ወመክሰብ ቱ ለትገብእ እኩ።

7. ክሉ መተንኩብክ እት ለትረክቡ መክሰብ ኢልግባእ

ሰሩ አውቃት እት ክል ወሬሕ ወሰነት ላዝም ኢኮን መክሰብ እግል ትርከብ ለትቀድር። መባጽሕክ እተ ምስል ወቅት ለትበጽሐ ቦባት ወርዝቅ፡ እምበል እት ናይ ክል ምዕል አውመ ወሬሕ አውመ ሰነት ለትረክቡ መክሰብ ኢልግባእ ወእሉ እት ተዐልብ ወቅትክ ኢተአብዳ። ብዝሕት ወትርድት ዐውቱ ወመክሰብ ዋጅድ፡ ወቅት ረዩም ወሰብር ቱ ለለሐዙ።

8. ሰርም ነኣይሽ ወላዝም እንተ እግል ትሽቀዮም ለአለብክ አሽቃል እግል ብዕዳም እዘም ምናም

መኣሰሳት እትለ ነኣነብት እቱ ወቅት፡ እብ ፋይሐት ርእየት ወወዳሐት እግል ንፈክር ገኣነ ምን ገብእ ላዝም፡ ሀምን እብለ መኣሰሰትን ሌጠ እግል ልግባእ ቡ። እግል ተፍኪር ወዕርፍ ለገብእ ወቅት እግል ንፈንቱ ብኩ። ክም እሊ እግል ወዲ ህዩ፡ ነኣይሽ፡ መረ ምህም ለኢገው ወላዝም ሕነ እግል ንውደዮም ለአለብክ ጋራት ብዕዳም አንፋር ዓኢለትን አው መሳዕዲን እግል ልውደም በክት ንፍተሕ። እሊ ለህነ እነ ፍክር ወቅደረት፡ ክለ እት ዐበዮት ወጠወርት ሐዳስም መኣሰሰትን እግል ንወጅሁ ሰዴኩ።

ቲፕ ወሽባብ

ባቅሺሽ (ቲፕ) እብ እትሊ ዘመን ለህለ መፍሁም፡ ምሮ ዓሚል እት ለገኣት እግል ምጅተመዕ ክድመት ለተህይብ መኣሰሰት፡ እብ ልትህየቦም ሽረፍ፡ መትከባት ወክድመት ዶል ልትረዩሐ እግለ ልትለኣክ፡ ሰመም ወክድመት ለህይቦም ለዐለ ነፈር ለለህዩቡ፡ ለትፈናታ ህያባት ወእብ ለመድ ህዩ ግሩሽ ቱ። መቅሺሽ ዩምክን እት ብዕድ መጅተምዓት ወገባይል እሉ ለመስል ለመድ እግል ለዐሌ ቀድር፡ ክቱብ ክመ ለሐብሩ ቲፕ አው ባቅሺሽ ለልትቢህል እት ሰነት 1688 ኤድዋርድ ሎይድ ለልትቢህል ወድ እንግሊዝ እት መዲነት ለንደን እተ ልትረከብ ሻሬዕ “ታውር” ሐቱ ገህወት ካፍት ዐለ። እትለ ገህወት እላቱ ህዩ ላናይ አወል ፍክር መቅሺሽ ለመጸኡ።

እትለ ገህወት እለ እግል መሰለሐት መትከብትን ጋሽ ለተን አዋልድ እንዴ ትቢህሉ ሐቱ “to insure promptness” ባህለት “እግል ኣክዶት ሽፋገት” ለልብል ለትከተብ እተ፡ እብ ሐጺን ለትሸቁት ንኢሸቶ ሰንዱግ እዱሉይ ዐለ። ለፍክር ምሮ ዐሚል ምጽእ ዶል ቤል፡ እትለ ሰንዱቅ ግሩሽ እግል ለኣቱ ወሐቀህ ለመትከብተት ሰኔት ከብቱ እግል ልውደየ እግሉ ቱ። እሊ ለሻፍገት ክድመት እግል ህዩብ እንዴ ትቢህለ እት ዐሰር ሰባዕ ክፈል ዘመን ለትበገሰ ፍክር፡ አሰክ እለ ዮም እንዴ ዜደ ወትለመደ እት ክለ እድንዩ እመር ልትረከብ። ለቲፕ ትብል ከሊመት ምን አወላደም ሕሩፍ ናይ to insure promptness ለትነሰኣየ ተን። መቅሺሽ እት ቃሙስ ኣክሰፎርድ ለኣቱት ከሊመት እት ገብእ፡ ተርጀመተ ህዩብ አው ኣትሳጅየት ባህለት ቱ።

ከሽባብ ዮም፡ ተርጀመት ወኣሳስ ቲፕ እሊ እት ለዐል ለሽረሕናሁ ሐቆ ገበእ፡ ሕነ ህዩ እብ ከአፎ እንርእዮ? ክም ፍክር ረኤናሁ ምን ገብእ ምሮ ሃይባይ ክደማት ወዐሚል ለልትከበት ነፈር፡ ለሸቅሉ ፈትዩ ገብእ ምን ገብእ፡ ምን አጅል ሓር መቅሺሽ ልርከብ እንዴ ኢገብእ፡ እግል ፈርሐት ነፍሱ ወገናዓት ሽቅሉ ተ ሰኔት ከብቱ ለለህይብ።

እግል ክል ልመጸ ዓሚል፡ ዕምሩ፡ ጅንሱ፡ ወጠንዮቱ፡ ወመቅደረቱ እብለ ኢከሰስ እግል ክሉ እብ ቀልብ ፋሬሕ ወገጽ ባርህ ለልትከበት መትከብታይ ዐሚል፡ ላዝም ምን ክሉም እተ አምዕል ለህ ለትከበትዮም አንፋር መቅሺሽ ምንመ ኢረክብ፡ ዩምክን ሰርም ቲፕ፡ ሰርም ኣትሳጅየት ለህዩቡ ወሰርም ህዩ ምዕል ሓራት እግል ምጽኡት ገለድ ለኣቱ። ፋሬሕ ላቱ መትከብታይ ገሽ፡ እት ዓማዊሉ ፈርሐት ለዐዴ። እግል መኣሰሰቱ ህዩ ዐማዊል ለአመስእ።

ዐሚል መልክ ቱ፡ ሽረፍ ወእሕትራም ለአሰትህሉ፡ ክእኒ ውድየት እግሎም እንዴ ኢገብእ እግለ መህየት ለደፈዕን ወእግለ እንሸቁ ህሊን መኣሰሰት ቱ ለለኣክሰብ። ከክልን እት ከዳማት እግል ገባይል ለለህይብ መኣሰሳት ለእንሸቁ አንፋር፡ ቲብ ክም እሻረት ፈረሕቱ፡ ምሮ ዐሚል እብ ምራዱ ለለህይብ ዕዳይ ክምቱ እንዴ አመርኩ፡ እት ወግም እግል ነኣትዩ ወእግሉ ንሸቁ ኢወጅብ።





ኬር ግርመት፡ እት ሰን ገቢል ዐለም ጀፍጠት

ግርም ተአትወልብ እት ልትበህል ሳምዓም እንገብኤ። እት ግርመት ለኢልትሐሰር ወነፍሱ እግል ለአትጋርም ለኢፈቱ ኢህለ። ለእብ ጠቢቦት ግርመት ለተሀየበት አንሳይት ላኪን ዝያድ ሕሰር ትትሀየብ። እት መጅተመዓት ጅግረ ግርመት ልሙድቱ። ዲብ መዓየ ትግሬ እትሊ ወክድ እሊ ዲብ ተርፍ ምንመ መጽአ ጅግረ ግርመት ገብእ ክም ዐለ ዐባዩ ወዕጉላም ለኣካ። እት መሀረጃናትመ ቀርብ።

እግል መሰል ወለት ዒዶ ለትበህል ጅግረ ግርመት አዋልድ



እት አፍዐበት ወድዋረ ትገብእ ነብረት። ዲብል ጅግረ ለሻርክ እብ ግርመትን፡ ብዋረትን፡ ሸለለን፡ ልብሰትን፡ ሰርጎህን ወለባበትን እብ ዐባዩ ዐድ፡ ዕጋል ወእትዬታት ምን ክል ድጌ ልትሐረየ። ሸዑብ እንዴ ትጀመሪ ለዐፍየን ወእብ ክሉ ሰፋተ ዕውትት ለገብአት ወለት ዒዶ እንዴ ትበህለት ስሜት ሕሸመት ትነሰኡ። አሰክ ሰነት ሓሪት ብዕደት እት እነነ ተሐልፍ ለስሜት ናያተ። እት ዓያድ እት ገብእ ዕፌ ወሰሰዒት ሆዩ ህተ መልከት እንዴ ገብእ ትሰመዕ።

እሊ ምን ሕዱድ ደዋሒ ኤራትርያ ለሐልፍ ምንመ ኢዐለ፡ እት ኤራትርያ ለተጀርባት ሐዳሰ ኢኮን። እት ዲብ ዐለም ለገብእ ጅግረ ግርመት ወለባበት ሆዩ ስሜት ወሰም ዐደ ለትረፊዕ ኤራትርያይት እብህዝት ሆሉት። ስኒት ሃብተአብ ተወልዴመድህን ትትበህል። እት ሰነት 2023 ሰይደት ጀማል ናይ አፍሪቀ (Miss Africa) እንዴ ገብአት እት መሰረሕ ፈግረት ከአክሊል/ብሉተ ዐውቱ ትሰርጌት።

ስኒት፡ እሊ ደረጃት እግል ትብእሕ ብዙሕ ሸቂት ወተዐበት። ለምነ ዐውቱህ ትረክቡ ማል ወኣብነት እትሚ ክም ተአውዕሉ ሀደፍ እመር ወባይን ሰበት ዐለ እሊ ሆዩ፡ እት መሰረሕ ልግበእ ወእብ መሕበራይ መትራክቢ ለረአየ እብ ሶቱ ወፍክሩ እግል ልሰደየ ቀድረ። ሀደፈ ዐቢቱ፡ እብሊ ጅግረ ለልትፈተሕ እሊ ባባት እት ሰዳይት

ምስክነ ዐቅል ወዐቦት ለብእቶም አጀኒት ወዕላጅ ሕማም ሰረጣን እግል ተአውዕሉ ክምቱ እግል ክሉ ፈታይ አትአመረት።

ስኒት፡ እት አሰመረ እንዴ ትወለደት ለዐቤት፡ እት መድረሰት ጥልያን ካልእ ደረጃት ተዕሊመ እንዴ አትመመት እት ማትሪክመ እንዴ ተዐወተት ዲብ ኩልየት ዕሉም ወቴክኖሎጂ ማይ ነፍሒ ድራሰተ እንዴ አንበተት ካልእ ሰነት እት ሀሌት ምን ኤራትርያ ለጅአት ክዲብ አሜሪካ አቴት። ምንኣሽ ምንኣሽ ሕተ ምስክነ ዐቅል ወዐቦት ገሮብ ሰበት ዐለ እቱ፡ እብ ከአፎ ረሕ እንዴ ቀድረት ክም ትነብር እወዴ ለልብል ሰኣል በሊሱ ተሐዜ ዐለት። እሊ ምንገብእ ሰልፍ ለሐንገል ወድ አዳም ከአፎ ክም ሸቂ እግል አምር ለሰዴኒ ዕልም እንሰእ ትቤ። ወዲብ መጃል ዕሉም ዓሳብ (ኒውሮ ሳይንስ) እት ለትወቀለ ብሐሳት ዓሳብ ለገብእ እት ጃምዐት ጆርጅ መይሰን እንዴ አቴት አወላይ ዲግሪህ እብ ዐውቱ አትመመት።

እሊ 178 ሰንቲሜተር ለብዋረተ ወለት 27 ሰነት ለህሌት ስኒት ምን ንኣሽ ለትፈናተ ምስክነ ለብእቶም አጀኒት ሰድየት ትፈቱ ዐለት። ገሌ ሰላሰ ለገብእ አጀኒት ምስል እንዴ ጀምዐቶም ትሰድዮም ወርያደት ተኣሸቅዮም ዐለት። አሜሪካ ክም አቴት ሆዩ፡ እመ ሰበት ትወፊት እግል ሕተ ክም እም ወመደርሰት እግል ትግበእ እሊ ዝያድ መሰሉልየት ረፍዐት። ምህርህ ዲብ ታቤዕ ክም ሕተ ለመሰል አጀኒት እብ ደረጃት ዐለም ሕሰር ወሰዳይት ለረክቦ እቡ በክት እግል ልትፈተሕ እሉም ለተአሰሚዕ እቡ ባባት ከሰት እዬ ለቴሎ ጅግረ ግርመት እግል ትሻርክ ትበግሰት። ሀደፍ ናይል እግል ሰልፍ ኢነት እት ሰነት 2023 ኤራትርያ እንዴ ወክለት ለሻርክ እቱ ጅግረ ግርመት አፍሪቀ፡ ለምስክነ ዐቅል ወገሮብ ብእቶም አጀኒት እት ክሉ ሐቆም እግል ልርከቦ ቱ ለዐለ። ዲብሊ ጅግረ ሆዩ ተዐወተት



ወሰይደት አፍሪቀ (Miss Africa) ገብአት ከዲብሊ ክለ እዲነ ለትፈረጅ መሰረሕ እንዴ ፈግረት ታጀ ሰቅለት። መንዴረት ኤራትርያ ረፋረፈት ወሰሚተ ወሰም ወጠነ ረፍዐት። ሐበን ወፋሽ ኤራትርያን ገብአት። ፈድል እሊ ዐውቱህ ሰፊረት ራቀቦት ሰረጣን ጥብ ገብአት። እብሊ እንዴ ትናየተት ዐደ ዲብ ዐለም እግል ትትአመር፡ ዓዳተ እግል ተአርኤ ዲብ ሰነት 2024 እት ጅግረ ግርመት ሰይደት ዐለም ሻረከት።

እት ጅግረ ሰይደት ዐለም አወላይት እንዴ ፈግረት ታጀ ምንመ ኢሰቅለት፡ ለመሸርዕህ እት ካርጅ ለትብሮ ኤራትርያን እብ ብዝሐ ምን ሰውተው እቱ እብ ሰዳይቶም እት ቀዳምያት 10 ትረተበት ከመዳልየት ነሓስ ነስኣት። ለዐውቱህ ክምለ ንዩተ ኤራትርያ ለወጅብ ሕሰር እግል ትርከብ ሰድ። ብዝሓም ተእሪክ ኤራትርያ እግል ለአምሮ ገብል ፈተሸው ወእት መሕበራይ መትራክቢ ሕላይ ኤራትርያ አትሐለው።

መልከት ጀማል አፍሪቀ 2023 ስኒት ሀብተአብ እት ጅግረ ግርም ዐለም ናይ 2025 ኢሻረከት፡ ለመሸሩዕ ሰኒ እግል ትዳሌ እሉ ምን ሐዜት። ዲብሊ ምን 29 ኣጎስት ኣሰክ 5 ሰብተምበር 2026፡ እት ሼትናም ለገብእ ናይ 2026 ጅግረ ላኪን እግል ትሻርክ ቱ።

እሊ ጅግረ እሊ ምን ግርመት ገሮብ ዝያድ እት እሉ ትቀድም መሸሩዕ ሰበት ተአተንክብ ምስል ሩእየተ ወንዩተ ለትናሱብ ጅግራ ቱ። እት ጅግረ እግል ትትዐወት ፈሀመ ጀላብ እግል ተአፍይሕ ምን 3-4 ኣጎስት 2026፡ እት አሰመረ እንዴ መጽአት እት መድረሰት ፍፍቱብርሃን ምስል ምስክነ ዐቅል ወገሮብ ለብእቶም አጀኒት ደረሰ ወዋልዴኖም አመሕበረት ወመሓደረት ሀበት። ክምሰልሁመ አንፋር መሕበር ምስኩናም ዐቅል ወገሮብ ትዋጀህት ወሀድገት። እት ተሌ ጅግራህ ለሰድዩ አፍካር ወፈሀም ሆዩ ረክበት። እት መሰተቀበል ሕተ ለመሰሎ ምስኩናም አጀኒት ለልትዐለም እት መድረሰት እንዴ




ፈትሐት እት ዐብቶም ሐዘተ እግል ቱዴ በርናመጅ ክምበ ሆዩ ሐበረት። ስኒት፡ እት ናይ ክልኤ ምዕል ጀውለተ ዲብ ሆቴል እምባሲሪ ምስል አንፋር መሕበር ዲዛይነራት ወዕፌ ፋሽን ለቀድመ አንሳት እንዴ አመሕበረትመ ተጃርብ ዱግምት ዐለት። ጅግረ ግርም ዐለም ለወድዩ መአሰሳት ናይ- ናየን ሀደፍ ወዋሙሕ ክም በን እንዴ ሸርሐት፡ ለእት ጅግረ ሻርክ አንሳት ዐቂደተን፡ ሸረፈን ወዓዳተን ለኢልሀትክ ክምቱ እንዴ አከደየ እግል ልእተያሁ መክረት። “ወጠንክ ወኖሰክ እንዴ አዝቤክ ለልትጃቀፍ ማላት ወለልትሰቀል ታጃት ዲመ ስኩብ ለከልእ ወተእሪክክ ወሀውየትክ ለለሀትክ ቱ” ሐቀለ ትቤ፡ ለትሻርክ እቱ ጅግራታት አውለውየት እግል እሉ ብገሳት ሀለየ ሀደፍ ወመሸሩዕ ለለሀይብ እግል ልግበእ ክምቡ ነስኣት። ህተ እግል ኖሰ ብዙሕ እንዴ ትጃገረት እግል ትትዐወት

እቱ ለትቀድር መሻፊዕ ምንመ ዐለ፡ ምስል እምነተ ዓዳተ ወሸረፈ ለገይሰ ምን ኢገብኣ እግል ትእዘም ምኑ ክም ቀረረት ሐበረተን።

መሻርከት ሆዩ ለዲብ ጅግረ ግርመት አፍሪቀ ለረክበት ዐውቱ ዲብ ጅግረ መልከት-ዐለም እግል ትድገመ እት ልተምዩ እሊ፡ ሕሸመት ወቅዮም ወጠን ለለዐቅብ ዲመ ሰርጉል ቱ፡ እሊ ትመሰል ሻበት ሆዩ መሰል ስኒት እግል ሐወ ወሐዋታ ተ ቤለዩ። ጅግረ ግርመት ዐለም ምን 130 ደውለት ለልትወክለ ገረርም ለሻርክ እቱ ዎሮ ምን ዐበ ጅግራታት ቱ። ኤራትርያ ሆዩ እግል ሰልፍ ዶለ እብ ስኒት እግል ትትወክል ቱ። እት ጅግረ ተእሪክ ወሓይሰ ጀዋንብ ዐደ ሰበት ተአትአምር ለትዐውተ ሐብሬ ካፍየት ናሰአት ሆሉት። ክምሰልሁመ እት ቀበትለ ጅግረ ክርንክ እንዴ ትነፈዕክ ሚ ተቅዩር እግል ተአምጽኣ አው ሚ መሻክል እግል ትባሌሕ ተሐዜ እትለ ዐለም በክት ለለሀይብ ‘ክርን እግል ተቅዩር (voice for change) ለልብል በርናመጅ ሰበት ሆሊ፡ ኤራትርያ ወዓዳተ እግል ትወክል ዱሊት ሆሉት።

ስኒት፡ እምበለ ረቢ ለሀበያተ ግርመት ለትመልኩ አምዋል ወዜነት ለይዐለ እሊ ምን በሕ እንዴ ትበገሰት እት ገበይ ዐውቱ ምን ሄረረት እግል ኤራትርያ ወኤራትርያን ሐበን ወተአምርተ ሰብር ቱ። ክል ዎሮ ለእሊ መልክ እበ እንዴ ትበገሰ እት ኬር ኖሱ ወዐዱ እግል ለአውዕል ክም ቀድር ሆዩ መሰል ስኒት ቱ።

ዓማት፡ ጀሪደት ‘ሓዳስ ኤርትራ’



እግል መደርሲን ድረስ ርዕደት ተሰየበ



ለክዳሚው መደርሲን

ሀደፍለ ድረስ፡ ቅድረት መደርሲን ዲብ ዐለሞት ምህሮ ርዕደት እግል ጠወርት እት ገብእ፡ እት ናይ ርክሰት 'ዲ' ድረስ፡ መወጅህ ወሙዲር ፍርዕ ቱክኒክ ፈደሬሽን ኮበሪት እግር ኤረትርዮ አሰይድ ዳንኤል የውሃንሱ ክምስልሁ መወጅህ አሰይድ እስቲፋኖስ አሰፋው ለሀበወ ዲብ ለዐለ፡ ለናይ ዳንዮት ድረስ እድንያይ ዳንዮ መምህር ሄኖክ ተስፋሚካኤል ወፈደራልያይ ዳንዮ መምህር የማኔ ገርጊስ ሀበወ።

እት ዲብ ቃዐት መድረሰት 2ይት ደረጃት እምበሀረ ለገአት መናሰበት ካቲመ፡ ለትህየበ ድረስ፡ እት ሸቅሎም ሴድያይ ክም ቱ ወግረ እላመ እግል ልተላሌ ክም ወጅቡ፡ ፈሬዕ ውብረት ተዕሊም አቅሊም ምግብ አተንበህ።

እብ ፈሬዕ ተዕሊም ለትዝመ ወወጠንያይ ፈደሬሽን ኮበሪት እግር አቅሊም ምግብ ለሰደዮም ዲቡ ድረስ ሸሃደት ርክሰት

ርዕደት ደረጃት 'ዲ'፡ ክምስልሁ ድረስ ዳንዮት ትልህየ ኩረት እግር ደረጃት-ክልኤ፡ ምን መአንብታይት፡ ምግባይት

ወካልኣይት ደረጃት መዳርስ እግል ትፋገረው 52 መደርስ ርዕደት ተሰየበ። እሊ ምን ዮም 4 አስክ 13 ኦጎስት

ለትህየበ ድረስ፡ እት ዳንዮት 22 ምን ሰብ፡ እት ሸሃደት-ርክሰት 'ዲ' ሀይ፡ አርበዕ አንሳት ለዐለዮ ዲቦም 33 መደርሲን ሻረከው።

ክል-ከረም ለገብእ ጅግራታት ደረሰ ግራሰ-ሩት ልተላሌ



እብ መዓወነት ፈሬዕ ርዕደት ወፈደሬሽን ሾሊቦል አቅሊም ምግብ እንዴ ትዝመ ገብእ ለሀለ ጅግራታት ርዕደት ከረም ምግባይ ዓማር (ግራሰ-ሩት) ለሐልፈ ሰነብት እት ሚዳን ቦቻፈላ እትሉሉይ ዐለ። ሰንበት ንኢሽ ሀይ ጅግራታት ፍረቅ ውላድ ገብኦ።

እት ዓማር 14 ወ15 ሰነት ጋላ-ነፍሐ እግል ማይ ተመናይ 2-0 እት ቀልብ፡ እት ዓማር 16 ወ17 ሰነት አርበዕቱ አስመረ ምስለ ፈዳብ መተልህያይ ጴጥሮስ የማኔ ኡቱይ ለሀለ ፈሪቅ ጎዳይፍ ትዋጅሁ። ጎዳይፍ ሐትሐቱ ኢነት ጀርቢታት ህጁም ወዱ ምንመ ዐለው፡ ለልዐውቶም ወቀይ ላቱ ይኣርአው። ወኡብሊ አርባዕቱ - አስመረ ምን ጽባብሐም ዲብ ዳፍዮ እት መስለሐቶም እንዴ በደለው፡ እትለ ሰልፋይት ትልህያሆም 2-0

ትነሰረው። እት ፍንጌ ምዴርያት ዐዳገ-ሐሙስ ወጋላ-ነፍሐ ለገአት ጅግረ ሀይ፡ ለዕዉት 2ይ ዲቪዝዮን ጋብእ ዐለ ፈሪቅ ጋላ-ነፍሐ ህጁማት

እት ወዴ ወታንጃሁ ፈሪቅ ዐዳገ-ሐሙስ እት ዳሬዕ፡ መጃገረት ውጅህት አርአው።

እት አውላይ ሾት ዐዳገ-ሐሙስ እብ መክሰብ እት ፈግር፡ እት ካልኣይ ሾት ጋላ-ነፍሐ እብ መትዝም ሐዲስ እንዴ አቅበለው ትልህየ 1-1 ወደው። ሳልሳይ ሾት ሀይ ናይ ምን ተዐወተ ሰበት ቱ፡ እት ዐዳጋ-ሐሙስ ለልተልሂ ፈዳብ መተልህያይ መሪሕ የናሱ፡ ደለ አዋዐመዋ እሉ ኩረት እት ሸውዋ ወዲብ ንቅጠት እት በድሉ፡ ዲብ ትልህየ ግርም ለአርአ ፈሪቅ ጋላ-ነፍሐ 2-1 እንዴ ተዐወተ ፈግረ።

ሰንበት ዐባይ እት ገአ ጅግራታት ሀይ፡ ፍረቅ ውላድ ዓማር 14 ወ15 ሰነት በሪኽ እግል አባሻውል 2-1፡ ወአዋልድ ጎዳይፍ እግል ማይ-ተመናይ 2-1 ቀልበያሆን። ፍረቅ አዋልድ አርባዕቱ አስመረ ወኣክርየ ሀይ፡



ከረን - ጅግረ ኮበሪት እግር አውላይ ዲቪዝዮን ልተላሌ

ሻምፕዮን ኮበሪት እግር ውላድ መዲነት ከረን፡ ለሐልፈ ሰነብት እት ሰታድዩም ከረን እብ አርበዕ ትልህያታት እትሉሉይ ዐለ።

ሰንበት ንኢሽ እስልፍ ፍረቅ ደሴት ወአልነጅም ትዋጅሁው። አልነጅም እት ካልኣይ ሾት ትልህየ እብ አቤል ጎይትአም ለአተወ ጎል እቡ 1-0 ተዐወተው። ነፈር ፈሪቅ አልነጅም የውሀንስ ፍሰሃ ለሐሰ መተልህያይ ናይለ ጅግረ ነስኦ።

ለተሉት ትልህየ ፍንጌ ፍረቅ ደንደን ወኢትዐብር ዐለት። ኢትዐብር፡ እት ሳድሳይት ደቂቀት መስጠፈ መሐመድ-ኑር ጎል ሻፍግ ሰበት አተ እሎም፡ ምን ጽባብሐም 1-0 ሕሳል ትልህየ ዋለው። ደንደንመ እት ልትሳሰዐው ወትልህያሆም ዲብ ነዝሞ፡ ቀደም ዕርፍ እብ አማን ዐብደለ ጎል እንዴ ረክበው፡ 1-1 እግል ዕርፍ ክም ፈግር ትጸገመው።



እት ካልኣይ ሾት ትልህየ፡ ህጁማቱ ለአደቀበ ፈሪቅ ደንደን፡ እብ መሃጅም ራኢ ፍጹም ጎል እንዴ ወሰከው፡ ምን ግረ እንዴ ትፈርገጸው 2-1 ተዐወተው። ራኢ ሀይ፡ ናይለ ጅግረ ለሐሰ መተልህያይ ነስኦ።

ሰንበት ዐባይ ለሰልፋይት ትልህየ ፍንጌ ፍረቅ አስሙድ ወከረን-ጅዲድ ገኦት። አስሙድ ዲብ 35ይት ደቂቀት እብ ለትጀዝብ ሐረከት መተልህየቶም የናሰ ወናህ ክልኦት ጎል ሕፋናም እንዴ አተው፡ እግል ዕርፍ 2-0 እብ ሚርሒት ፈግረው። እት ካልኣይ ሾት ለትወሰከ ጎል ሰበት ይዐለ፡ አስሙድ 2-0 ቀልበው። ጃእዝት ለሐሰ መተልህያይ ናይለ ትልህየ ኖህ ግርማይ ነስኦ።

እምበል እሊመ፡ ፈሪቅ ዳር-ሰላም ምስል ገዛባንዳ ዲብ ወደየ እት መዳፍዐት ለአተንክበት ትልህየ፡ ገዛባንዳ እት 56 ደቂቀት ተመስገን ብርሃኔ እበ አተዩ እሎም ጎል፡ እብ ጸቢብ 1-0 ተዐወተው። ፈሪቅ ዳር-ሰላም ሀይ፡ ሰልፋይ ቅልብ ትክበተ።

ለሐሰ መተልህያይ ናይ እለ መጃገረት፡ ካፒታኖ ፈሪቅ ገዛባንዳ ማትያስ ተክሊዝጊ እግሉ ተሰየበት። እሊ ጅግረ ማሌ አተሉት ወየም አርቦዕመ ለአተላሌ ክም ሀለ፡ ፈደሬሽን ኮበሪት እግር መዲነት ከረን ሕቡር ሀለ።




ምህሮ ወወቦች ህግደ

ዶ/ር ሳልሕ መስመድ



ረዩም ለአቅመተ ዐገል ምህሮ ጀብህት ሽዕብዮት



ጀብህት ሽዕብዮት ሰነት 1970 ምን ጀብህት ተሐሪር እንዴ ትፈንቴት እብ ሰለስ እንክር (አወላይ እንክር ምን የመን በሐር እንዴ ተዐደ ዲብ ደንካልዮ፡ ካልኣይ እንክር ምን ከርስ ዐድ እብ እንክር ዓሌ፡ ወሳልሳይ እንክርም ምን ከርስ ዐድ ዲብ ያበል) ክም ፈግረው፡ ምሮ ተንዚም እግል ለአሰሶ ዲብ ሰዱሕ ዓለ (ደንካልዮ) አመሕበረው። ለረዩም ለአቅመተ ዐገል ምህሮ ህዩ ዲብ እሊ ናይ ተአሲስ እጅትመዕ ትኤተነ ወትሀደገ እቡ። እተ ሰኒን ለህይ እሉም ምን ጀብህት ተሐሪር ለትፈንተው ሉዳም መአሰስት ጀብህት ሽዕብዮት ላቶም ምሕርበት እብ እንክር ምሮ አቶብዩ ወእብ እንክር ምሮ ጀብህት ተሐሪር እግል ለአብድምም ልትነዐምም ዐለው። ህቶም ህዩ ሰልሲቶም እንክራት ምሮ ተንዚም እንዴ አሰሰው ህለዮቶም እግል ለአመርዱ ናይ ህለዮት አው ኢህለዮት ግድለ እቱ ጽሙዳም ዐለው። ምናተ እትሊ ለመሰል ናይ መፋገረት አርወሕ ግድለ ጽሙዳም ዲብ እንቶምም ናይ

ረዩም መባጽሖም ኢትረሰወው። እት ፍንጌ ኮፍ ወፈረጀ ዲብ እንቶም ሐቆ ሕርየት ለትትአሰስ ዱለት ኤርትራዩ ለአፍኩ ዐለው። ዱለት ሐዳስ እምበል ምህሮ ክም ኢትትከወን ሰበት አመረው ዐገል ምህሮ ሕርርት ኤርትራዩ ምን ዮም ሐቆ ኢትኤተነ ወኢትሸቀ እሉ ፈጅር ሐቱ ዶል ክም ኢልትወተድ ወኢበቅል ሰበት አመረው እተ ሰድት ሓለትመ ኢትረሰወው። እሊ እት ሰነት 1970 ለትኤተነ ዐገል ምህሮ ጀብህት ሽዕብዮት ናይ

ቅሩብ ወናይ ረዩም መባጽሕት ወወራታት ዐለ እግሉ። ‘ቅዌት ጽልመት አምዕል ተ’ ክምሰለ ልትበህል፡ ቅዌት ለይኣብደ ምሕርባይ መባጽሖ ሰበት ኢልአምር፡ ለዐገል ምህሮ ሰልፍ እት ምሕርበት ጀብህት ሽዕብዮት ተአምበተ። አስክ ሰነት 1975 ኩሉ እት ጀብህት ሽዕብዮት ለዐለ ምሕርባይ ቅዌት እንዴ አብደ ክም ከትብ ወቀርእ ገብኡ። እት ረአስ እሊ ምህሮ ስያሰት ወተአረክ ዲብ ደርስ አምሩ ወፈዛዐቱ ወቀሉ።

ምን ሰነት 1975 ወሐር ላኪን ወራታት ምህሮ ምን ምሕርበት ወኪን ዲብ ሽዕብ ለለአማድድ እቱ ተየልል እት መጽእ ወለዐቤ ጌሰ። እት ብሩር ኤርትራዩ ለነብር ሽዕብ ኤርትራዩ ምን በክት ተዐለም ሕሩም ሰበት ዐለ ሰውረት መስኡልየት ዐለሞቱ እግል ትርፈዕ ዐለ እግሉ። እት ረአሱመ ሕሩር አራዲ ኤርትራዩ እንዴ ፊዬሕ ሰበት ጌሰ አባይ ላመ መዳርስ ለዐለ እቱ ዐዶታት ወመዳይን እብ ዋያራት መዳርሱ ሰበት አንደደ በክት ምህሮ ለኢረክብ አጅያል እንዴ በዚሕ ጌሰ። ምን ጀራይም አባይ እት ለሀርብ ሰሩ እት ደወል ግዋሬ እንዴ ለጅኦ እት መዐስከራት ትኣከበ። ሰሩ ህዩ ምድሩ እንዴ ጠለቀ እት ከርስ-ዐድ ትሸወተረ። ጀብህት ሽዕብዮት እሊ ኩሉ አጅያል ፅምር ምህሮ እንዴ ኢልሐልፉ እግል ልድረስ

ዐለው። መድረሰት ሰውረት እብ ሀገጊ ትግርኛ ወትግሬ ለደርሶ ምን 1ይ-3ይ ፊልል ለደርሶ 306 ደረሳይ እንዴ ጸብጠት አምበተት። መባጽሕ መትአምባት መድረሰት ሰውረት እት አርሀዮት እሊ እት ለዐል ለሳሚንሁ መሳድድ ሌጠ ለትክለበ ይዐለ። ተንዚም ጀብህት ሽዕብዮት ምን ምዕል እት ምዕል እት ለዐቤ ወሸክል ሕኩመት ዘመናይት እት ጸብጥ ገይሰ ዐለ። እግል እሊ ከፈፍል ዘመናይ ተንዚም ለትኣትሐዜ ዕልምት ሓለት ወድ-አዳም ትትሐዜ ዐለት። ለትፈናተ ቅድራት ለዐም ምሕርበት ሐዳይስ እብ ዶል-ዶሉ እተ ተንዚም ልትሓበሮ ምንመ ዐለው። ሚ ዶል ወአክል አዮም ወእት እሰዉ መጃል ክም መጽኦ ሰበት ኢልትአመር፡ ለተንዚም ምን እት እዲሁ ለህሌት ሓለት አዳም ለለአትሐዘዎ ቁድረት ለትፈናተ



(ዜሮ) ተአምበተት። ለናይ ሰልፍ ደረሳህ፡ ምን መዐስከር ሽዕቱራም ከርስ-ዐድ ደብዐት፡ ምን መዐስከር ላጅኢን ወደልሐለው (ሱዳን)፡ ምን እት ሀይኣት ተድራብ ብሌቃት ለዐለው ሽመንከሊታት ምሕርበት፡ ምን እት ለትፈናተ ከፈፍል ተንዚም ውዙዓም ለዐለው ንኣይሸ ምሕርበት፡ ምን ሕሩር ምድን ውብሩር ኤርትራዩ እግል ልናድሉ ለመጽአው ፅምርም ሰነት ርፍዐት ሰለሕ ለኢበጽሐ ምሕርበት ሐዳይስ ወምነ ባካት ለመጽአው

ምህናት እግል ለአፍሬ ዐለት እሉ። ወእብሊ ሸባብ እት መድረሰት ሰውረት እንዴ ደርሰው፡ ቅድረት ሚካኒክ፡ ቴክኒካናት፡ ኦፕሬተራት፡ ሐካይም፡ ሰዋጌን ዐረባት ውብዕድ እሉ መሰል መሓግዝ ናይለ ተንዚም እግል ለአርሀ ሐቱ ምን መድረሰት ሰውረት ለትፈተሐት እግሉ አቅራቢ ቱ።

መትአምባት መድረሰት ሰውረት ምን ናይ ዶሉ አርሀዮት መሳድድ ተንዚም እንዴ ሐልፈ ሐቆ ሕርየት መስኡልየት ሕርርት ዱለት ኤርትራዩ ለለትክበት ጂል ዕሉም አፍረዮት ለለአቀምት ዐለ። እግል እሊ ለለአሰብት፡ መድረሰት ሰውረት ዲብ ጭልሕንቴ እትለ ዐለት እቱ ሰኒን ደረሰ “ሕነ እግል ንትሓረብ ዲብ ኢኮን እግል ንድረስ ሰውረት ኢፈገርን” እንዴ ቤለው አስክ ክፈል ተዐለም እግል ሊጊሶ ክም ጠልበው፡ ናይለ ተንዚም ናይብ አሚን ዓም ለዐለ ናይ ዮም ርኢስ ኢሳይያስ ኣፈወርቂ እግል ለአትሃድኦም መጽኦ። ክእነ ህዩ ቤለዮም። “እብ ሰለሕ ለትትበኔ ዱለት አለበ። እሊ ዮም ትርእዎ ለህሌኩም መዳፍዕ ወደባባት ፈጅር እግል ዝክረት ዲብ መትሐፍ እግል ንኣትዩ ቱ። መሀንድሲን፡ ሐካይም፡ መደርሲን ውብዕዳም ዕሉማም ቶም ለዶል ለአትሐዘን” ቤለዮም።

ዐቦት ህግደ

ዐገሎት ህግደ ሚ ቱ ወእብ ከፎ ገብእ?

አወላይ ክፋል

ለገብኣት ህግደ፡ ዐባይ ትግበእ ወንኢሸ፡ እት ምድር ፋዬሕ ለትትሀደግ ትግበእ ወእት ምድር ጨቢብ፡ ብዙሕ ሽዕብ ለልትሃገዩ ትግበእ ወሐድ ሽዕብ ለልትሃገዩ፡ መፈናቲት ለሀጃት ለአለበ ይህሌት። መፈናቲት ዲብ ንጥቀት አክራን (ለፍዝ)፡ መፈናቲት ዲብ መዐነት ከሊማት፡ መፈናቲት ዲብ ከወኖት ከሊማት፡ ወመፈናቲት ዲብ ተርቲብ ከሊማት ዲብ ታመት ሕሰበት እግል ለህሌ ላዘም ቱ። ምሮ ከእበ ናዩ ለሀጃት ሐቆ ከትብ እሊ ለእምቤሉ መፈናቲት ልዝሀር ወአከይ-ፊህም መዐነት እግል ለህሌ ቀድር። ከእብሊ ሐቱ ህግደ ምን ህግደ እብ አፍ ዲብ ክትብ እግል ትትዐዴ ገብኣት ምንገብኡ፡ ኩሉ እበ ህግደ ለልትሃጌ ነፈር ለልፍህመ ገበይ እበ እግል ትትከተብ በ። እሊ በህለት ለንጥቅለ አክራን፡ ለመትከዋን ናይለ ከሊማት፡ ለመዓኒ ናይለ ከሊማት፡ ለተርቲብ ናይለ ከሊማት እት ታመት ሕሰበት ሐቱ ንዝም እግል ልጽበዋ ቡ በህለት ቱ። እሊ ሸቅል እሊ ህዩ ዐገሎት ህግደ (Language Standardization) ልትበህል።

ሐቱ ህግደ እግል ትዐድል ሰልፍ ለትትከተብ እቡ ሕሩፍ እግል ለህሌ እግል ለአትሐዜ። ሐቆሁ ክታበት ናይ ክል-ከሊመት ዲመ ለኢትትባደል እግል ትግበእ በ። እግል መሰል ስሜት ህግደ ትግሬ ሐቱ ዶል “ትግራይት” ወካልእ ዶል “ትግራይት” ሐቆ ከተብናህ ህግደን ዕግልት ይህሌት በህለት ቱ። እተ ክምሰልሁመ መዓኒ ናይለ ከሊማት ክል-ዶል ሐቱ እግል ልግበእ በ። እሊ ህዩ ቃሙስ (ክብት-ቃላት) ሰኒ እንዴ አትዳሌክ ለገብኡ ቱ።

መትከዋን ከሊማትመ ሐቱ ዐይነት እግል ልግበእ በ። እግል መሰል “ከበሮ” ለትብል ከሊመት ዶል ትትባዘሕ፡ ዶል ሐቱ “ከበሮታት”፡ ካልእ ዶል “ከባቢር” ወሳልስ ዶል “ከቡር” ትትከተብ ሐቆ ገብኣት ለህግደ ዕግልት ይህሌት። ኩሉ እበ ህግደ ለከትብ፡ ምን እለ መጽኦ ልምጸእ እብ ሐቱ ገበይ እግል ለአትባዘሐ ወጅብ። እት ተርቲብ ከሊማትመ ሐቱ ገበይ እግል ንተሌ ወጅብ። እግል መሰል፡ ተርቲብ ከሊማት ህግደ ትግሬ ሰልፍ በዐል-ቤት (ለውዳይ ለወዳ)፡ ወሐቆሁ ግቡእ (ለውዳይ ለጆሬ እቱ)፡ ወአሰሩ ውዳይ ቱ። እግል መሰል፡ “ዕሰማን መንተሌ ቀትለ”። ምን እሊ ተርቲብ እሊ እንዴ ፈገርኩ “መንተሌ ቀትለ ዕሰማን” ሐቆ ትቤ ህግደክ ዕግል ይህሌት። ተርቲብ ከሊማት እት ደረጃት ዋናበትመ (Phrase) እሙር ተርቲብ ህለ እግሉ። እግል መሰል ሰልፍ ሰም ወሐቆሁ ሰፈት መጽኦ። “ወለት ግርም” ዕግል ቱ። “ግርም ወለት” ላኪን ዕግል ኢኮን። እሊ ህዩ ክታብ ሰዋሰው ሰኒ እንዴ አትዳሌክ ወኩሉ ክም ለአምሩ እንዴ ወዴክ ለልትዐገል ቱ።

እተ መጽኦ ዐሙድ፡ ዐገሎት ህግደ እት ለትፈናተዩ ሀገጊት እብ ከፎ ክምሰል ገብኣ እግል ንሸረሕ ቱ።

ተአምሮ ገብኡ?

1. ቅዋት ተሐሪር ሽዕብዮ (ሐሬ ጀብህት ሽዕብዮት ለትሰሚት) እት ሰነት 1970 እት ሰዱሕ-ዓለ እት ወዴቱ ናይ ተአሲስ እጅትመዕ መትአምባት ዐገል ምህሮ ዲብ ሕሩር አራዲ ኤርትራዩ ሀድገት።
2. ምን ሰነት 1970-1973 ምሕርበት ቅዋት ተሐሪር ሽዕብዮ ኩሉም ቅራኣት ወክታበት ቀድረው።
3. 1975 ቅዋት ተሐሪር ሽዕብዮ መንህጅ (ካሪክለም) ለተአትዳሌ ልጅነት ከወነት
4. 1976 ሰብተምበር መድረሰት ሰውረት ዲብ በዐት ቢጫይ (ዜሮ) ተአምበተት።
5. 1978 እበ ምን መድረሰት ሰውረት ለትረከበ ተጃርብ ናይ ምግባይት መርሐለት መንህጅ (ካሪክለም) እንዴ ትዳለ እት ወርሕ ሰብተምበር ዲብ ሕሩር አራዲ መዳርስ ምግባይት ደረጃት ተአምበተ።
6. 1983 ወርሕ ኦብራል ምን መድረሰት ሰውረት ለፈግረው ደረሰ ወመደርሲን ዲብ ክለ ኤርትራዩ ፊራራ ኦብደዮት ቅዌት አምበተው።
7. 1985 ወለት መድረሰት ሰውረት ላተ ቤት ምህሮ ቴክኒክ ዊና ተአምበተት።